

1 CORINTHIANS

Lat Inan Paul.angan Ump Pam wanch Aak Corinth Puchan Al-Alantana

¹⁻² Ngan Sosthenes.angana, niliya ngurp ngamparama, lat inan umpan niyant Christians.antan aak Corinth.angan wun-wunaniy. Nil God.angana ngayangan mi', a' kuch ngayang wik waa'-waa'āng pam wanchantan Jesus.antamana. Niiyanganiy-a, an God.ang thaa'-palath niyang pam wanch nungantam yipam iiy-iiyāna, niy yipam karpam iiy-iiyān nungantangan Jesus Christ.antangana, a' woyan min nungantaman wak-wakāna. Puth niyam thonakam ya'a, pam wanch wiy anangan thamp-a, aak nath-nathan wun-wuntan-a, Lord Jesus Christ.antan mee'an wuth-wuthanamantan nungantan, a' mooman waa'-waa'antan nunang. Niliy putha moom thanttam a' puth moom ngamparam thampa. Ngamp yotamang karpam monkan-wak-wakanamp nunang. ³ Ngay kaangk paththama pul God.angan minam anman pi'-pi'owpul niyang, a' puth ngangk min anman yump-yumpowpul niyang, pul God.angana piip ngamparamanga a' putha Jesus Christ.anga moom pi'an ngamparamangana.

Nil Jesus Christ.an Ngangk Minangam Iiy-Iiyan Niiyanta

⁴ Ngay ma'-yotam thankyou thaw-thawang piip God.antan niyantamana, niy puth Jesus Christ.an monkan-wak-wakaniy nunanga. A' ngay thankyou thawang nungant God.antana nil puth Jesus Christ.an ngangk minangam iiy-iiyan niyantana; ⁵ a' ma'-yotam ma'-aath-aathan niyang, a' woyan min meen-meenathan niyant, niy yipam woyan nungantamana minam

thiichāna a' wik nungantamana waa'-waa'ān wiyantan thampa. ⁶ Ngan ka'athamana wik Jesus Christ.antaman waa'an niiyanta, puth anpalaan-a, niiyaniya ngangk thee'an nungant a' ngan ngeey-ngeeyan niiyantamana niy ngangk thayanam ngul monkan-wak-wakaniy nunang, Jesus.ana. ⁷ A' nil God.angan yotam ma'-aath-aathan niiyang, work min thee'-thee'an niiyant, niy puth kuup-kuupaniy yippaka aak-aakanakaman nil Lord Jesus Christ.an palaman wampowa. ⁸ Nil puth Jesus.angan aak-aakanakaman minam anman pi'-pi'ow niiyang, niy yipam ke'-ngoongkam anman monkan-wak-wakān nunang. Yaa, ngulana, nil God.angan umangan than-thanathow niiyangan-a, nilan ke' kuchiy niiyang aak way aakanakan, ya'a. ⁹ Niliya wik inangan kan-kanam pi'-pi'owa, nil wik ke' pipiya, ya'a. Nilam puth ka'athan thaa'-palath ngampang nhengk nungantaman monkan-wak-wakāmp nunang, moom ngamparaman Jesus Christ.ana.

Ngamp Ke' Yaarkathwump Ngamparakamana

¹⁰ Niiyalang, ngurp ngatharam-ang, nil Christ.an kaangka ngay wik inangan thaa'-thayanam thaw-thawāng niiyantana: ngampana ke' thonamang anman monkan-wak-wakāmp nunang, Jesus Christ.ana, kul ke' uw-uwāmp ngamparakamana, a' ke' yaarkathwump ngamparakamana, ya'a, ngamp karpam anman iiy-iiyāmp a' ngaantam-ngeey-ngeeyāmp thakan kuchekangana. ¹¹ Ngay puth wik kan ngeeyang niiyantamana niyan kul uw-uwaniy niiyantakamana. Pam wanch workan iiy-iiyantān Chloe.antan-a, than waa'in ngathar. ¹² Niiy puth wik thon-thon ngul thaw-thawaniy ey? Niiy wiy anangan thaw-thawaniya, “Ngan Paul.an monkan-wak-wakanan nunang a!” A' niy wiy anangan thaw-thawaniya, “Ngan

Apollos.an monkan-wak-wakanan nunang a!” A' niy wiyaniy thaw-thawaniya, “Ngan Peter.an monkan-wak-wakanan nunang a!” a' puth niy wiy anangan thaw-thawaniya, “Ngan Christ.an monkan-wak-wakanan nunang a!”

¹³ An ya'a! Niy wik way thamp thaw-thawaniya! Niy thawaniy Christ yot ngul ey? Ya'a, an Christ thonam anmana. Ngul ngay in Paul uthamang niyant ey? yuk wu-uyanangan ey? Ya'a! Than niyangan kootra ngakangan kuungkina, niy yipam ngayangan monkan-wak-wakān ey? Ya'a! Niy Jesus Christ anman monkan-wak-wakān nunang a! ¹⁴ Ngay thankyou thawang nungant God.antan ngay puth ke'am kootra ngakangan kuungkang niyang — ngay pam kucham anman thonakam kuungkang pulang, Crispusa a' Gaius, pulang anman. ¹⁵ Puth ngay nath kootra ngakangan kuungking niyangana yot inanganwey-a, niy nath ngaantam-ngeeyin ngay ke' moom ngamparam Jesus.an ey? niy ke'-paal ngayangan monkan-wak-wakān ey? An ya'a! Christ anman ngaantam-ngeey-ngeeyān a! ¹⁶ A' than inangan thampa Stephanus.ana puth kampan nungantam anangan thampa ngay kootra ngakang ku-ungkang thananga. A' ngay ke'-ngul ngaantam-ngeeyin ngay wee'-wee'anangan natha kootra ngakangan ku-ungkang thanangan thampa. ¹⁷ Nil ngul Christ.angan kuch ngayang ey? ngay yipam pam wanch kuchek kuungkāng thanang ey? An ya'a! Nil ngayangan kucha ngayan yipam wik nungantaman waa'-waa'āng niyantana, niy yipam Christ.an ngangkangam pi'-pi'an nunang. Nil ke'am kuch ngayang wik yipam waa'-waa'āng ke' pam pi'anang yimanangana. Niy ke' ngaantam-ngeey-ngeeyān ngay ke' pam kuchek min yimananganiya iiy-iiyanga, an ya'a, ngay thonakam wik nungantam anan waa'-waa'āng niyantana. Ngay nath ke' pam pi'anang

yimanangan wik waa'-waa'ing niyantwey-a, niyan puth wik ngatharamana ke' ngaantam-ngeey-ngeeyin, ngayan wik waa'-waa'ang niyant Christ.antamana. Niiy nath ngaantam-ngeeyina nil Christ.an ke' micha pongama! a' puth aak-ya'ang thakan uthama. An ya'a! Nil pi'an paththama, a' nil utham yipam way ngamparam anpalana nil kaa'-piichanathow ngampang!

Nil Christ.an Yuk Wuuyanangan Utham-a, An Nil Meenathan Ngampar Nil God.an Kan-Kanam Pi'an a' Thayan Paththam, a' Kuchek Waap Min Paththam.

¹⁸ Pam wanch wiy anangana God.antan man-mangkam thee'antan nungant, than woyan way wak-wakantan aak way aakanakan woyan wunana. Than kanam ngeeyin nil Jesus.an yuk wuuyanangan utham pam wanchanta, puth thananiya thaanchalathin, ngaantam-ngeeyina ke' wik waya. Puth than wiy anangana, epa woyan min anan God.antaman wak-wakantana, aak nungantamakan woyan wun-wunana. Thanan thaw-thawantana, “Wik anangan nil Christ.an yuk wuuyanangan utham ngamparana, an wik mina, ngamp kaangka ngeey-ngeeyampa. Puth inpalana ngamp mee'miy ngula nil piip God.ana pi'an paththama ngampangan kaa'-piichanathana.” ¹⁹ Lat ngench thayanangan wik God.antam inangan waa'a:

“Pam wanch wiy anangan ke' kuchek min ngaantam-ngeeyantan thanttakamana,
 puth ngayaniya ngul meenathang thant than kuchek waap min ya'a,
 puth thananiya yaan aak-ya'ang muukamathwuntan thanttakamana.”

²⁰ Than pam wanch wee'-wee'anangan kuchek waap min iiy-iyantana a? An ya' paththam a! Than pam wanch wee'-wee'anangan wik thayan anangan minaman thiichantana a? An ya'a! Than wee'-wee'anangana aak inganiy

wikan kuchek waap minangam waa'-waa'antan a' putha koochanathantan thakan a? An ya' paththama! Nil puth God.angan kan meenath pam wanch anangan kuchek waap min than ya'ana!

²¹ Pam wanch wiyangan ngaantam-ngeeyantan thanttakaman than kuchek waap min iyy-iiyantam, ke'-paal than min-minam paththam God.an thiichantan a' min-minam paththam ngaantam-ngeeyantan nunang. Puth an ya'a, nil God.aniy thawa thananiya ke'am min-minam thiichantan nunang yimanangana, kuchek waap thanttam anpalaan ya'a. Nilam thonakam kuchek waap min-minam paththam iyy-iiyan. Wik Christ.antam ngampam waa'-waa'anamp-a, thananiya ngaantam-ngeeyantan, “In wik waya, ngan ke' ngeey-ngeeyāna.” Puth nil God.ana thaw nilan kaa'-piichanathow ngampang pam wanch anangan wik nungantam anangan ngangkangam pi'-pi'anampana. ²² Than pam wanch Jews anangan kaangk nil God.angan work pi'-pi'anam anangan meen-meenathow thanta. Than thawantan than ke'an thathiythanan-a, an than ngangk ke' thee'iythan nungant God.antan, ya'a. Than Greeks anangan kaangk pam wanch anangan ngeey-ngeeyayn thanang wik pi'-pi'anam thaw-thawayn ulp-ulpanangana, than puth ngaantam-ngeeyantan ke' wik God.antaman an waya. ²³ Puth ngananiya Christ.an waa'-waa'anam niyant, nilan yuk wuuyanangan utham ngamparaniya — than puth Jews ya' al-alangan wik inangan ngaantam-ngeeyantan ke' wik waya; a' than Jews al-alangan man-ngeeyin nunang nil puk nhengk God.antamana, puth nilan yuk wuuyanangan uthama, ke' pam way yimanangan uthama. ²⁴ Puth pam wanch wiy anangan epa, Jews-a, putha Jews ya' anangan nil God.angan ump thanang nungant wampayna, a' than wik nungantaman ngeey-ngeeyina,

a' monkan-wak-wakin nunang. Than ep ngaantam-ngeeyantan nil Christ.an yuk wuuyanangan utham-a, an nil meenath ngampar nil God.an kan-kanam pam pi'an, thayan paththama, nil ngampangan kaa'-piichanatha way ngamparam anpalana, a' nil kan-kanaman kuchek waap min paththam. ²⁵ Pam wanch wiy al-alangan ngaantam-ngeey-ngeeyantan ke' God.an kuchek waap chil min iyy-iyyan — an ya'a, nil ep-paththama kuchek waap min-minam paththama, nil ke' ngamp yimanangan ya'a, nil ep kootra waap min paththam iyy-iyyan, an nil-nil, pi'ana, way min ma'mangkam nilam yump, ngampang thamp nilam yump. A' wiy al-alangan ngaantam-ngeeyantana ke' nil chil pi'ana, an ya'a, nil epa wuut pi'an paththam, nil ke' wiy yimanangan ya'a.

²⁶ Ngurp ngatharam-ang, nil God.angan kan ump niyang niy yipam pam wanch nungantam ngul iyy-iyyāna. Puth niy ngaantam-ngeey-ngeeyān niyantakamana: niy ko'alam thonakam kuchek waap min iyy-iyyaniy mee' pam wanch wiyantangana; niy ko'alam thonakam pam pi'ana, a' putha niy ko'alam nath moom pi'an thakan iyy-iyyaniy. ²⁷ Puth nungkway niy kuchek waap min ya' mee' wiyantangan-a, nil God.angan mi' niyangweya niy yipam pam wanch nungantam ngul iyy-iyyāna, nil yipam ngul-nyaa' yumpow thanang than anangana ke' kuchek waap minan ngaantam-ngeey-ngeeyantan thanttakamana. A' nil mi' niyangweya niy wiy anangan pam pi'an puth ya'a, than pam pi'an anangan yipama ngul-nyaa' weenayna, than anangan pi'anan waa'-waa'wuntana. ²⁸ A' nil mi' niyang niy wiy anangan pam wanch कांग्क-ke'anangana, niy pam wanch many iyy-iyyaniy mee' wiyantangan, thanan कांग्क waa'-waa'ayn niyang ke' niy kuchek waap ke'anang yimanangan iyy-iyyaniy. Puth nil mi' niyang

yipam meenathow thant moom pi'an al-alantana woyan thanttamana an min ya' mee' nungantangana, an way paththama. ²⁹ Puth ngamp pam wanch pi'an ke' waa'-waa'wimp mee' God.antangana, an ya'a, ngamp ulp-ulpanang ke' meek yimanangan ke' iiyāmp, ya'a. ³⁰ Puth niyanganiy-a, nil God.angana kaa'-piichanath niyang, karpath niyang nungantang Jesus Christ.antanga, a' nil Jesus.angan kuchek min yump-yumpow ngampang ngampam yipam min-min thiichāmp nunang God.ana. Nil Jesus.ana thaa'-pant thaw-thawan God.antan ngamp-paramana ngamp wayan yump-yumpampa nil ke'-ngul yipam ngaantam-ngeey-ngeeyowa, nil yipam ma'-aath-aathow ngampang woyan nungantaman wak-wakāmpa ngamp puth pam wanch nungantama iiy-iianampweya. ³¹ Ngay nanpalaan wik inangan waa'-waa'āng niyant than keenkanaman umpin lat ngench thayanangana, "Ngamp pam wanch ulp-ulpanang ke' iiy-iiyāmp a' putha pi'an ke' waa'-waa'wimp ngamparakaman ya'a, ngampiya Lord anman thonakam pam pi'anana waa'-waa'āmp nunanga!"

2

Ngay Jesus Christ.an Thonakam Waa'-Waa'ang Niiyantam Nilan Utham Yuk Wuuyanangan Ngampara

¹ Ngurp ngatharam niyalang, ngay anan wampangan niiyantam-a, ngay wik God.antaman waa'-waa'ang niyanta, wik nungantam anangana an kan-kanama. Ngay wik ulp-ulpanang ke'am waa'-waa'ang niyant niy yipam ngaantam-ngeey-ngeeyān ngayang ke' pam kuchek waap min yimanangan, an ya'a. ² Ngaywey niyantangan wunwunangan-a, ngayana ngaantam-ngeeyang ngatharakamana ngay Jesus Christ.an thonakam waa'-waa'āng niyantana, wik thon ya'a, wik anman Jesus Christ.antam, nilan yuk wuuyanangan utham ngamparana. ³ Ngay

ngangk thayanam ke'am wampangan niiyanta, ya'a, ngay winyinyang mo'angana, kemp akangam than-thanangan, ngay puth ngaantam-ngeeyangan ngatharakamana ngay nath wik minam engkanang ke' nath waa'-waa'ang niyantana. ⁴ Ngay ngul kuchek waap minangam wik waa'-waa'angan niyantana ey? niyy yipam wik ngatharaman ngeey-ngeeyān ey? An ya'a. Ngay ngul thaa'-ay wikan thaw-thawangan niyantana ey? ke' ngay ngaantam-ngeey-ngeeyangan ngatharakamana ke' kuchek waap min ey? An ya'a. Nil Ngeen-Wiy Min God.antam alangan ma'-aath-aatha ngayang wikan waa'-waa'ang niyant, a' putha meen-meenth niiyanta nil God.an kananam pi'an, thayan paththama, ⁵ niyy ke'-paal nanpala ngangkan thee'-thee'an nungant Christ.antana, niyy God.an pam pi'an ngaantam-ngeey-ngeeyaniy nunang, ngan ep-paththam ya'a. Puth ngayaniy-a, ke'am kuchek waap minangam thaw-thawang niyant.

Ngay Wik Min Paththam God.antam Waa'-Waa'anga

⁶ Puth in ngeeyiy a! Ngay kan-kanam wik min paththam God.antaman waa'-waa'ang niyant wiy alantana, niyy wee'-wee'anangan ngangk thayanaman monkan-wak-wakaniy nunang Christ.an, niyy yipam God.an min-minam paththam thiichān nunang. Ngay puth wik pam wanch al-alantaman ke'am waa'-waa'ang, ya'a, a' putha wik pam moom pi'-pi'anam al-alantaman ke'am waa'-waa'ang, ya'a, puth than pam pi'an yaaman ke'-ngul iyy-iiyayn, an ya'-ngul, than ngul wayamantana. ⁷ Ngayaniya ep wik min paththam God.antaman waa'-waa'ang ka'atham anpala nil wik inaniya ma'-mupam pi'-pi'a nungantakama. Keenkanamana, aak inan ke'aman yippak wun-a, nil-nilaman ngaantam-ngeey

ngampan nungantang iyy-iiyāmp, a' aak minang wun-wunāmp nungantanga. ⁸ Puth pam pi'an anangan aak ingan wun-wuntan-a, than wik min nungantam anangan min-min ke'am ngaantam-ngeey-ngeeyantan ya'a. Than nath min-minan ngaantam-ngeeyiythan nunang God.an-a, than puth Christ.ana ke' mulathiythan nunanga yuk wuuyanangana, ya'a, moom pi'an ngamparamana, pam min-minam paththam niliya. ⁹ Puth than keenkanamana wik God.antam inangan waa'in lat ngench thayanangan:

“Than wee'-wee'anangan God.antan kan-kanaman
kaangk paththaman wuntan nungantan-a,
nil minam paththam ngul iyy-iiyow thanta.

Ngamp ka'athaman ke'aman yippak thiichamp nunang
God.an nil want-wanttakan min-minaman iyy-
iiyow ngampar,

a' ke'am ngeeyamp yippak, ke'am thathamp thaka, a'
ke'am yippak ngaantam-ngeeyamp.

An puth nilam God.angan nathpalman ngaantam-
ngeey nungantakamana nil minan iyy-iiyow
ngamparana.”

¹⁰ Puth nil Ngeen-Wiy Min God.antamangana kan waa'
ngampar, nil piip God.an kan-kanam paththam mee'miy
nunang nathpalmana, nil min-minaman paththama. Nil
Ngeen-Wiy Min God.antamana mee'miy nil God.an want-
wanttakana, a' puth nil wanttakan ngaantam-ngeey-
ngeeyan thakana, an nil Ngeen-Wiy.ana mee'miy. ¹¹ Nil
wee'ang nath mee'miyana nil pam thon alanganiya want-
takana ngaantam-ngeey-ngeeyana, a' putha nil want-
wanttakana ngangkangan pi'-pi'an thakana? An ya'-
ya'ama! Nilam thonakam pam alangaman mee'miy nun-
gantakamana. Nil wee'ang nath mee'miy nil God.angan
want-wanttakana ngaantam-ngeey-ngeeyana, a' putha
nil want-wanttakan ngangkangan pi'-pi'an thakan a?

An ya'-ya'ama! Nilam thonakam ep-paththam thiichan Ngeen-Wiy Min nungantam alangamana pul puth thonama. ¹² Nil Ngeen-Wiy Min inana, nil aak inpalman ke'am wamp, ya'a, pamantam ya'a, nil God.antam Ngeen-Wiy, nil puth kuch nunang ngangkangan wunwunow ngamparanga, ngamp yipam ngaantam-ngeey-ngeeyāmp nil God.an ngangk minangam paththam iyyiyan ngampar, ma'-aath-aathan ngampang. ¹³ Yaa, ngan nanpalan wik God.antaman koochanathanan niyant wik kuchek nganttam inpalan ya'a, puth wik Ngeen-Wiy Min God.antam alantamana nilan waa'-waa' nganta, a' ngananiya niyant ngul waa'-waa'anana nil puth Ngeen-Wiy Min anmana ngangk niyantamang wun-wunana.

¹⁴ Nil pam wee'angan Ngeen-Wiy Min God.antam ke'aman ngangkangan pi'-pi'an nunang-a, an nil wik God.antamana ke' ngeey-ngeeyiy, ya'a, nil ngaantam-ngeeyiy nungantakamana an ke' nil wik way waa'-waa'an; nil min-minan ke' thiichiy wik anangana. Than puth wee'-wee'anangan Ngeen-Wiy Min God.antam ngangkangan pi'-pi'antan nunang-a, an thanam thonakam wik nungantaman min-minam thiichantan. ¹⁵ Nil Ngeen-Wiy Min God.antam alangana ma'-aath-aathan thanang anangaman wik ma'mangkam anangan min-min yipam thiichayna. Puth than wee'-wee'anangan Ngeen-Wiy Min God.antam ke'aman ngangkangan pi'-pi'antan-a, an than ke'am min-min thiichantan thanang pam wanch God.antam anangana. ¹⁶ Than keenkanam wik inangan umpin lat ngench thayanangan:

“Nil God.an wee'ang thiichiy nunang nil ngeen nathan ngaantam-ngeey-ngeeyan e? An ya' paththama!

Nil wee' thawiyanta nil want-wanttakan iyy-iiyow e? Ya'anmana!”

Puth nil Ngeen-Wiy Min God.antaman ngangk ngam-parangan wun-wunana, a' nil ma'-aath-aathan ngampang ngamp yipam Christ.an min-min thiich-thiichāmp nunang nil want-wanttakan ngaantam-ngeey-ngeeyan thampa.

3

Ngan Work Iiy-Iiyanan Nungant God Alantan Work Nilan Thee' Ngant

¹ Ngurp ngatharam-ang, niy wik inan ngeeyāna: ngay ka'atham niyantangan wunungan-a, ngay puth kaangk wikan thawāng niyantana ke' niy Ngeen-Wiy God.antaman ngeey-ngeeyaniy nunanga, puth ya'a, niy ke' puk manyangan ngaantam-ngeey-ngeeyan-a, niy yimanangan ngaantam-ngeeyaniya, niy wik min nungantamana min-minam ke'am ngaantam-ngeeyaniya, ya'a.
²⁻³ Ngay wik God.antaman manyam thonakam thaa'-aath-aathangan niyang, niy ke'am yippak minaman ngaantam-ngeey-ngeeyana, ya'a. An ke' ngay niyang may thuut aath-aathangana, may minh nga' thakan ya'a, ke' puk thaa'-paapiyangan ke' yippak minh nga' thakan mungkantan. A' niy in-inman iiy-iiyaniya ke' puk many thaa'-paapiy yippaka, niy ke' pam wanch way iiy-iiyaniya, ke' niy Ngeen-Wiy Min God.antamana ngangkangan ke'am pi'-pi'aniy nunanga, puth niyaniya mee'-wun-wunaniy niyantakamana a' putha niy kul thaw-thawaniy niyantakam thaka. ⁴ Niiyana yaark-yaark iiy-iiyaniya, niyantakaman thaka, niy puth wiy anangan ulp-ulpanang thaw-thawaniy, “Ngay Paul.antang iiy-iiyanga”, a' niy wiyiya ulp-ulpanang thaw-thawaniya, “Ngay Apollos.antang iiy-iiyanga”, – in min ya' niyanta. Niy wik thaw-thawaniy ke' niy pam wanchangan God.an ke'aman yippak thiichin nunang.

⁵ Nil puth Apollos.an pam ngeen iiy-iiyan a? Ngay Paul inana ngeen iiy-iiyang thamp a? Nganiyweya pam ke' niy yimanangana, ngan pam pi'an ya'a, an puth nilam God.angan kuch nganang wikan waa'-waa'an niy-iyant, niyan yipam ngangk thee'an nungant. Ngan work iiy-iiyanan nungant work nilaman thee' ngantanweya. ⁶ Ngay wik God.antam ka'athangaman waa'-waa'angan niyantana-a, an ke' ngay may kaanch kaamp-kaampangan aak gardenangan, puth wik anangan-a, ngangkangan ngoonch niyanta; a' ngul-ngulana nil Apollos.an wamp niyantana ngula a' wikan waa'-waa' niyantana thampa, an ke' nil aak gardenana ngakang ngul kuungku-kuungkan. Puth nil wee'ang kaanchan em-emathan e? Nilam piip God.angan thonakam em-emathana! ⁷ Puth nganiya work thonakam iiy-iiyanan piip God.antan, nganiya ke' pam anangan gardenan pi'-pi'antanweya, ke' may kaanch thakan kaamp-kaampangan, ngakang thakan kuungku-kuungkanan thampa, aakan-a, yimanangan wunana. An nganiya pam pi'an ya'a, nilam thonam anman ep-paththama piip God.ana, nil anman mayan em-emathan, man-yetham pi'-pi'an. ⁸ Ngan wiyanganiya wik God.antaman waa'-waa'anan pam wanchantan than aak keenkaman ke'aman yippak wik ngeeyina; ngan pam wiyiy-a, koy-koyyuw wampan thantana a' ngan wik putham ngul thaa'-aath-aathan thanang wik min God.antaman; puth ngan yotamana picham karp-karp iiy-iiyanan mee' God.antangan, a' karpam ma'-aath-aathwunana, work thonam anman iiy-iiyananweya. Nil God.angan work nganttam il-ilantaman thath-thathan. Work minam nath iiy-iiyinwey-a, nil God.antan-a, ngangk min wun-wunowanta, a' nilan waa'ow nganang ngula nganan work min iiy-iiyanan. ⁹ Ngan karpam work iiy-iiyanan nungant God.antang, ke' ngan garden nungantam

pi'-pi'anang yimanangan, niyany-a, ke' garden nungantam yimanangana.

¹⁰ A' inan thampa: nganana karpam work iyy-iyyanan God.antan ke' aawuchan kaachantan. Niiyiya ke' aawuch nungantam yimanangana. Nil God.an min iyy-iyyan ngathara, a' nil work thee' ngathar ke' moom pi'an iyy-iyyāng thant than aawuchan kaach-kaachantana. Ngayaniya ka'athaman wik God.antaman waa'-waa'angan niyant, an ke' ngay yuk thaa' thanathangan aakangana. Pam wiy ngul koy-koyyuw ngatharangan wampin-a, thaa'-aath-aathin niyyangwey-a, an ke' thana ngul aawuchan yump-yumpin. Puth ngampaniya wee'-wee'anangana work iyy-iyyanamp God.antan-a, kan ngamp work minam anman iyy-iyyāmp nungantana!

¹¹ A' ngamp thonakam Christ.antam wik waa'-waa'āmp a' wik pam wiy al-alantamana an ya'a! An nilam thonakam ke' yuk thaa'an aawuch aakanakan. ¹² Pam wanch wiy al-alangan wik Christ.antaman minam waa'-waa'antan niyant, an than ke' aawuch min kaach-kaachantan, yuk min-miniy anpalan, nath yuk goldama, nathwey yuk silverama, nath kunttow min anpalan yumpantan, aawuchan yaam anman yipam than-thanow, ke' yipam keekowa. Puth pam wiy al-alangan wik minam ke' waa'-waa'antan niyant, ya'a, an than ke' aawuch way kaach-kaachantan, yuk way anpalan, nath yuk cheewama, nath wakamweya, an aawuchan yaam ke' than-thanow, an erkam keekowa. ¹³ Aak anan wampowan-a, nil

Christ.angan umangan than-thanathow ngampangan-a, ngamp ngul thathāmp work ngamparam yotamantamana nath mina, nath ya'a, waya. An nil ke' God.angan work Christians yotamantamana ke' thumang yimanangan thenchowa, work ngamparam wiyantaman-a, erkam penchow, a' minchow ngul, puth an work wayan iyy-iyyin.

Puth work ngamparam wiyantaman-a, ep ke' penchiya, ya'a, an minam anman wun-wunowa, puth thananiy work minam iyy-iyyin. ¹⁴ Pam wanch il-ilantan-a, work minan iyy-iyyinan-a, nil God.ana min iyy-iyyow thanta. ¹⁵ Pam wanch wiy anangan-a, work wayan iyy-iyyinan-a, an ke' work thanttamana thumang pench-penchowa, than puth pam wanch ananganiya erkam pentayn thum anpalan, ke' penchiythan ya'a, nil puth God.angan ngul kaa'-piichanathow thanang, a' aak nungantamakan kalow thanang ngul, puth nil work thanttaman ke' minan waa'owa, ya'a.

¹⁶ Niiy puth inan ngaantam-ngeeyāna: nil Ngeen-Wiy Min God.antamana ngangk niiyantangan wun-wunan, an niiyan ke' aawuch nungantama nil piip God.an wun-wunana. ¹⁷ Than wee'-wee'ananganweya woyan wayakan kaliythan niiyangan-a, mee'-wichiythan niiyanganwey-a, yaa, an nil God.angan ngul wayathow thanang. A' niiy wee'-wee'anangan wayamān-a, woyan way aakanakan weentān-a, nil God.angan ngul wayathow niiyang, an way ngul wampow niiyant, niiyiy puth ke' aawuch God.antam aak nilan wun-wunana, nilana pokkap kiikath niiyang pam wanch nungantam yipam iyy-iyyāna.

¹⁸ Niiy puth ke' ulp-ulpanangan iyy-iyyāna. Niiy wee'-wee'ananganweya ke' kuchek waap min nath ngaantam-ngeeywin niiyantakaman-a, ke' kuchek waap min iyy-iyyaniy mee' pam wanch yotantangan-a, yaa, niiyan ke' ngul pi'anang yumpwuna, niiy ke' ngaantam-ngeeyān yimanangana ke' kuchek waap pi'an kal-kalany. Niiy minam ngaantam-ngeeyāna nil yipam God.angan wik nungantam anangan kuchekangam ngoonchathow niyantana, an puth niiyana kuchek waap min ngul iyy-iyyāna. ¹⁹ Than putha pam wanch wiy anangan thanttakam ngaantam-ngeey-ngeeyantan ke' kuchek

waap min iyy-iiyantana, thananiya wik God.antaman ke' way ngaantam-ngeeyantana — in puth waya mee' God.antangana. Than pam prophets al-alangan wik inangan keenkanam umpin lat ngench thayanangana, “Pam wanch wiy anangan ke' kuchek waap min thant-takaman ngaantam-ngeeywuntana, an thaniya ke' yuk trapang wipayn ke' minh nga'weya, thananiya wayath-wuntan thanttakamana, nil puth God.angan ngul mamow thanang.” ²⁰ A' wik inangan thamp lat ngench thayanangan umpina, “Than wee'-wee'anangan ulp-ulpanangan ngaantam-ngeeywuntan thanttakamana ke' kuchek waap minan-a, nil Lord.angan mee'miy thanang than way-wayam paththam ngaantam-ngeey-ngeeyantan.” ²¹ Yaa, puth ngamp pam teachers anangan ke' ulp-ulpathāmp thanang, ke' than pam pi'an yimanangana. Puth nilaman ep-paththam piip God.angan yot-yotam thee'-thee'an ngampara. ²² Yaa, puth niyy yimanangan ke' thaw-thawāna, “Ngay Paul.antang iyy-iiyanga, ngay nath Apollos.antang iyy-iiyanga” — puth ngamp yotamana ma' God.antang iyy-iiyanamp. Nilam puth kuch nganang niyyantana, ngay-a, Apollos-a, a' putha Peter.ana. Nil ma'mangkam thee'-thee'an ngampar ngampangan yipam ma'-aath-aathow ngampang. Nil aak inan umy-ompanamana thee' ngampar thampa, a' nilaniya man-yetham pi'-pi'an ngampang. Ngamp uthamāmp ngulan-a, an min wunow ngampar. Puth inpalman-a, a' ngulakamana nil ngul ma'mangkam thee'-thee'ow ngampar ma'-aath-aathow ngampangwey. ²³ A' ngampan karpam iyy-iiyanamp nungantang Jesus Christ.antangana ngamp puth pam wanch nungantam a' nilaniya God.antang iyy-iiyan, nil puth nhengk nungantama.

4

*Nil Christ.angan Kuch Nganang Wik Nungantaman Waa'an
Niiyant Pam Wanchantan*

¹ Niiy ngaantam-ngeeyān ngananga Apollos.angan ngan pam inangana work iiy-iiyanan nungant Christ.antana a' putha nil God.angan wik nungantamana ma' nganttangan wanta, ngan yipam waa'-waa'ān niiyant — wik anangana, nil ka'athaman wik thenchanaman pi'-pi'a, a' nilana kan-ngul wik engkanang waa'. ² Nil pam wee'an workan iiy-iiyan God.antan-a, nil work minam ke'-ngoongkam anman iiy-iiyow nungant, man thayanam anman iiy-iiyow. ³⁻⁴ Niiy nath ngaantam-ngeey-ngeeyin ngay ke' work minam ke'am iiy-iiyang, nath pam wanch wiyangan nath yimanangan thampa ngaantam-ngeey-ngeeyiythan ngayang — an kana, niiy puth moom ngatharam ya'a. A' ngay ke'am ngaantam-ngeey-ngeeyang ngatharakam ngay wanttak natha workan iiy-iiyanga, nath minama, nath ya', waya, puth nilaman ep-paththam God.angan thath-thathan ngayanga. Ngay ngaantam-ngeeyang ngathamang ngay work way-way ke'am iiy-iiyang, puth nil God.ana wanttak nath thawow ngath a? Nilam thonakam ep ngangk thath-thathan ngayang, nilam ep ngul thawow ngathara ngay nath work minam iiy-iiyang, nath ya'a. ⁵ Niiyaniya erkaman ke' ngaantam-ngeeyān, a' putha thawān thakana work nganttamana ke' waya, niiyiya kuup-kuupān aak-aakanakaman nil moom Christ.an palaman wampowa. Nil epa pam wanchantan ngangk thath-thathan ngamparaman, a' nil ngul waa'ow ngampar yotamantana ngamp want-wanttakan ngangk pal pekkuwaman ngaantam-ngeey-ngeeyanamp, ngangkangam thakan pi'-pi'anampana. An ke' nil nganth pi'an yumpow ngul, nil yipam ngangk ngamparamangan

park-parkow pekangkana, an meenathow yotantan. An-anियangan-a, nil God.angan ngul thaa'-kuumpow thanang pam wanch anangan than minaman ngangkangaman pi'-pi'in nunangan.

⁶ Ngay nganttakam Apollos.ang yaan waa'anga, niy yipam wik God.antaman ngaantam-ngeey-ngeeyāna, a' woyan min wak-wakāna. Niy wik inan thamp ngeeyāna: niy ke'a kaangkuyathān thanang pam wanch wiyiya, puth ke' ulpathān thananga. Puth wiy anangan-a, kaangk-ke'anangana ke' waa'ān thananga! An min niyant ya'a — niy pam manth-thayan niyantam yotam anangan minam anman ngaantam-ngeeyān thanangweya! ⁷ Ngul nil wee'ang thath-thathan niyangana pam pi'-pi'anam iyy-iyaniy a? An ya'a! Nilam God.anga yotam yump-yump. Ngul niy yuk way min thakan niyam yump-yump ey? An ya'a! Nilam God.angan yumpa! Niy ngul kuchek waap min niyangam yumpwun ey? a' ma'-kunch thakan yumpwun ey? An ya' paththama! An nil God.anga yimanangan ma'-kunch yump niyang! Yaa, niy kuchek min waa'win ey? a' putha ma'-kunch waa'win ey? An ya'a!

⁸ A' niy ngul ngaantam-ngeeyaniy niy ke' wik yotam anangan thiichaniy God.antaman ey? ke' nil God.angan wik yotam anangan kan waa'-waa' niyant ey? An ya'a! Niy ngaantam-ngeeywuniy niyantakamana niy ke' pam wuut pi'an ey? puth nganan ke' pam pi'an ya' ey? An ya'a! Niy nathwey kan-kanam pam pi'an iyy-iyyinwey-a, yaa, an puth kana, mina, ngamp karpam yipam pam pi'an iyy-iyimpa, puth ya'a! ⁹ Puth ngayan ngaantam-ngeey-ngeeyang ngatharakama nil God.angan pam pi'an ke'am yump nganang Apollos.angan ya' thampa, ngan pam manya, kaangk-ke'anangweya, ngan pam inangan nilan kuch nganang wik nungantaman

waa'-waa'ān niyant pam wanchantana. Ngan puth pam kaangkuy ya'a, ngan inanganweya ke' pam anangan keenkan mulathin thanang, mee' yotantangan a' putha mee' ngaantiyongkantang thampa. ¹⁰ Ngan wik Christ.antaman waa'-waa'anan pam wanchantana puth wiyangan waa'-waa'antan nganang ke' pam kuchek waap ke'anang yimanangana; puth niyaniya ngaantam-ngeey-ngeeyaniy niyantakamana ke' kuchek waap min ey? ke' niy woyan Christ.antaman minam thiichaniy ey? Than wiyangan waa'-waa'antan nganang ke' pam manya, puth niyiya ngaantam-ngeey-ngeeyaniy niyantakamana ke' pam pi'-pi'anam a' thayan paththam iyy-iyyaniy ey? Than wiyangana thaa'-thengkathantan nganang, puth niy ngaantam-ngeeyaniy niyantakama ke' than wiyangan min paththam waa'-waa'antan niyangan ey? — an ya'a!

¹¹ Ngan nathpalmana a' in-inman meech iyy-iyyanan, a' ngakam uth-uthamanan, a' ngook way kal-kalanan a' puth-a, than wiyangan piik-piikantan nganang; putha ngan thaa'-weep-weepanan palam-puyama. ¹² Ngan ma' nganttang work tha'iy iyy-iyyanan, ngan yipam may thakan piyy-piyyānwey. Than wiyangan aak-ya'angan wayan waa'-waa'antan ngananga, puth ngananiya thawanana God.antananana minam iyy-iyyow thantanweya; than piik-piikantan ngananganweya a' thaa'-thengkathantan nganang thakana, puth ngananiya aak thaamp-thaampanan. ¹³ Than wik uuy-uuyamantan thak wik aak-ya'angan waa'-waa'antan nganang puth ngananiya thaa' itangam thaw-thawanana thant, thaa' poch-pochaman ya'a. Than puth pam wanchangan in-inman ngaantam-ngeey-ngeeyantan ngananganweya ke' wook way paththam aakangan wun-wuntana than pam wanchangan tha'angan maak-maakantan.

¹⁴ Niiyalang, in ngeeyāna, ngay niyyang ngul-nyaa'

yumpanakan lat ke'am umpangan niyanta, ya'a, ngay kaangk niy niyantakaman ngaantam-ngeey-ngeeyāna niy want-wantakan iyy-iyaniya, puth niyaniya ke' puk ngatharam yimanangan iyy-iyaniya, ngay kaangk wunwunang niyantana, ngay kaangk paththam niy minam iyy-iyāna. ¹⁵ Pam yotangan thaa'-wantanamangan nath wik Christ.antaman waa'iythan niyanta, puth ngay thonakam ke' piip niyantam yimanangan iyy-iyyang ngula. Ngay puth ka'athama wik Christ.antaman waa'-waa'angan niyantana, a' anpalmana, niy ngangk thee'-thee'an nungant ngul, a' pam wanch nungantam ngul iyy-iyaniya. ¹⁶ Yaa, puth ngayiya thaa'-thayanam thawang niyant: niy woyan ngatharaman maakān a! ¹⁷ Ngay ke'-paala Timothy.an kuchāng niyantana. Niliya ke' nhengk ngatharam yimanangan iyy-iyyana, puth nil ngurp-ngana, a' nilana Jesus Christ.ana ke'-ngoongkam anman monkan-wak-wakan nunang. Niliya putham ngul waa'-waa'ow niyant woyan Christ.antaman ngayan wak-wakanga a' aak nath-nathana waa'-waa'angan pam wanch Christians al-alantan, churches thanttamangana.

¹⁸ Pam wanch wiy anangana niyantangan-a, pi'an yump-yumpwuniy niyantakamana, niy puth ngaantam-ngeeyan ke' ngayaniya ke' wampāng niyant an aak nanganiya. ¹⁹ Nil nath moom ngamparam alangan Christ.angan kuchow ngayang-a, yaa, ngay erkam ngul wampāng niyant aak nanganiy. Ngay wampāngan-a, ngay ngul thathāng niyyang niy wee'-wee'anangan pam wanch pi'-pi'anam yump-yumpwuniy niyantakamana, niy nath ngangk thayanam Christ.an monkanan-wak-wakaniy nunang, nath ya'a, yaan nath thaw-thawaniya. ²⁰ Puth ngamp wee'-wee'anangan ma' God.antangan iyy-iyanamp-a, ngamp wik thonakam ke' thaw-thawāmp, ya'a, puth nil ma'-aath-aathan ngampang ngangk

thayanam monkan-wak-wakāmp nunanga. ²¹ Yaa, niy kan-ngul mi'āna. Ngay wampāngan-a, ngul ngay wak-wakāng niyang ey? nath ya'a, ngay nath ngangk minangam wampāng niyantweya, thaa' itangam thaw-thawāng niyant — yaa, kan niy ngaantam-ngeeyāna, a' mi'ān ngula niy want-wanttakan iiyāna.

5

Ngay Wik Way Niyantaman Kan Ngeeyanga

¹ Niy kan in ngeeyāna: ngay wik way niyantaman kan ngeeyanga, nil pam nanana kaath ikampungan nungantam nil alantangan wun-wunana nungantangana, wanch thum piip-kunchantamana. An min ya'a nil yimanangan yumpana, an way paththam yump-yumpana. An ke' nil kaath nungantam ngula. Than pam wanch wiy anangana, than God.an ke'an mee'miy nunang ya'an yippaka. Puth thananiya way paththam yimanangan ke'am yump-yumpantan ya'a. ² Yaa, niy puth ngeenak ulp-ulpaniy niyantakaman e? An niyantang ngangka way paththam wun-wuniy a! Nil pam alangan wayan yump-yumpan-a, niy kenthān nunanga, nil niyantang anman ke'-ngul iyy-iyyowa.

³⁻⁵ Nungkway ngay niyantang nanman ke'amwey wun-wunang-a, ngay puth ma'yotamana ngaantam-ngeey-ngeeyang niyang, an ke' गया niyantang nanman wun-wunang. A' putha ngay kan mee'miy nunang pamana nil way paththaman yump-yumpana, a' ngay in thawāng niyant nil Christ.angan waa' ngath: niy paman wakān nunang, a' puy kenthān nunang, nil puth way-wayam paththam anan yump-yumpana. Niiyiya karpam ngul yalmathwuna. Ngayiya ngul ngaantam-ngeeyāng niyang, ke' ngay thampana nanman niyantanga. A' nil Lord Jesus.ana niyantang nangam iyy-iyyow thamp.

Nila thayan paththam, nil ngul ma'-aath-aathow niiyang. Niiy pamana ma'am thee'an nunang oony way alantan, nil yipam thiichow nungantakamana nil wayan yump-yumpana, a' nilana ke'-ngul pam wayan iyy-iiyowa, yipam ngul-ngulana nil God.angan kaa'-piichanathow nunang aak anan wampowana nil pam wanch yotam anangan than-thanathow um nungantangana.

⁶ Yaa, niiy ulp-ulpanang ke' iyy-iiyān a! An min niiyant ya'a! Niiy wik inangan kanam ngeey-ngeeyana, “Nil wanchangana yeast manyam yeechantan may aachichangana a' mayana pi'an ngul ulpan.” Yaa, in yimanang aak wunana: nil pam wayana niiyantang anman iyy-iiyowan-a, ngul-ngulana niiy yotamaniya way ngul weenāna, a' way paththam ngul iyy-iiyān. ⁷ Yaa, niiy puth wayan wantāna, niiy yipam min anman iyy-iiyāna, puth niiy pam wanch Christ.antam, nil kan pachath niiyang niiy wayan iyy-iiyan. Nil puth kanam theetath nungamang uthamow way ngamparamakana, nil ke' minh lamb Piip God.antam. Than puth keenkanamana may pi'an Passover.an mungkmungkin a' minh lamb mulathin, nil God.angan yipam chaapar minh lambantaman thathow, a' nilan-a, kaa'-piichanathow thanang ngul. ⁸ A' aak Passover.angan-a, than may yeast kath keenkanamana piw thee'ina, an way ngula, a' may breadana yeast ke'anang mungkin, than yipam ngaantam-ngeey-ngeeyayn nil God.an kaangka than minam anman iyy-iiyayn, wayana ke' iyy-iiyayna. Yaa, ngamp wayan iyy-iiyanampan-a, an ngamp kan-ngul wantāmpa! Christ.an minam monkan-wak-wakāmp nunang a' minam anman iyy-iiyāmp, wikana kan-kanam thaw-thawāmpa a' koy' iyy-iiyāmpwey.

⁹ Ngay ka'athaman latangan umpangan niiyanta niiyana pam wanch way al-alantangan ke' ngotan-ngoongchāna. ¹⁰ Ngay puth pam wanch anangan

ke'am waa'-waa'ang thanang than God.an ngoongk-ngoongkamaniy iyy-iiyantān, than anangan maarichan kee'-kee'antan, a' yangkan mo'-mo'antan, puth yuk way min wiyantaman ma'-kuchathantan, puth yuk ngeen-wiy thakan thaa'-kuump-kuumpantana. Ngay pam wanch nanangan ke' waa'-waa'ang thanang ya'a. Ngamp mak nyiināmp thanttanga, wik thaw-thawāmp thanta. Ngamp nath waank iyyimp thanttamanwey-a, puth aak earth inmana an too wantāmp a! ¹¹ Ngay pam wanch wiy anangan waa'-waa'ang thananga ke' Christians.an waa'-waa'wuntana, puth ya'a, thaniya way paththam iyy-iiyantān, maarich kee'-kee'antan, yangk mo'-mo'antan, yuk thaa'-kuump-kuumpantan ke' god thanttam yimanangana, wik way kal-kalantan, ngak way mungkan iyy-iiyantān, a' putha yuk way min wiyantam ma'-kuchathantan. Ngay pam wanch inangan waa'-waa'ang thanang. Niiy ke' iyy-iiyān thanttangana a' ke' nyiinān thak thanttangana, a' putha may thak ke' mungkān thanttangana, ya'a.

¹²⁻¹³ Than pam wanch wiy ananganiya than yippak ke'a-man thiichin nunang God.ana, an than ma' ngatharang ya'a, ngay ke' mep-meping thanang, ya'a. God.angan ep ngangk thath-thathan thanang, a' nilaman ep ngul mepow thanang. Puth niiy wee'-wee'anangan Christians.an iyy-iiyaniy-a, niiy thath-thathwun niiyantakamana. Than wee'-wee'anangana nath way iyy-iiyantān-a, niiy wakān thananga. Than wee'-wee'anangana nath way anman iyy-iiyiyanwey-a, niiy kenthān thanang, than niiyantang anman ke'-ngul iyy-iiyayn.

6

Niiy Kulangamana Ke' Kalwun Courtakana!

¹ A' wik inangan thamp ngeeyāna: nil Christian thon alangana way nath yumpiy niyant-a, yaa, niy ke' charge. impungin nunangweya a' courtak thakan ke' kalin nunanga, an ya'a! In way paththam niyanta! Puth pam moom courtakana than ngoongk-ngoongkam nunang God.ana! Niiy pam wanch Christians wiy al-alantan iyyāna, a' waa'ān thant, than yipam ma'-aathayn niyang kulan ya'-ngul minchow. ² Puth ngul-ngulan-a, aak ing kenyan-a, ngampiya pam wanch God.antam al-alangana pam wanch yotam anangan um ngamparangan ngul than-thanathāmp thanang pam wanch yotam anangan aak ingman earthangan wun-wuntanana. Niiy inan ep mee'miya! Yaa, niy ngul wanttaka kul niyantaman ke'am wantaniya? An-ngul kul pi'anana aka, an kul manya! ³ Niiy ngul ke' mee'miy ey? Ya' ey? Ngul-ngulana aak in kenjana ngamp ngaantiyongk anangan thamp umangan than-thanathāmp thananga. Puth niy kul pek-pekwinana aak earthang ingan-a, niyana kulan minchathāna, a' niy ngangk minangam iyy-iyyān niyantakamana. ⁴ Yaa, ngul niya Christians nath kul uw-uwin niyantakamanwey-a, niy ngul wanttak kal-kalwuniya courtakaniya? puth than moom anangan courtakan-a, than ke' mee'miy nunang God.ana! ⁵ Niiy ngul-nyaa' iyyin a! Ngul pam thonam puy ya' ey? niyantang ey? kuchek waap min thamp ey? nil yipam ma'-aathow niyang, niyan yipam kulan minchathān niyantakamana. ⁶ Niiy ngul ngeenak kulangam kal-kalwuniy courtakan e? Niiy ngul ngeenak kal-kalwuniy Christians ya' al-alantan a? A' niy ngeenak waa'-waa'wuniy um thanatangana?

⁷ Ngay mee'miy niyantamana niy puth woyan God.antaman minaman ke'-ngul wak-wakaniy, ya'a. Niiy courtakan kulangam ke' kal-kalwin a! In way paththam niyant a! Niiy yaaman ke' ngaantam-ngeey-ngeeyān

way thanan yump-yumpantan niyantana. An mak way thakan yumpayn niyantany a! A' way min niyantaman mak ma'-kuchathayn a! Yaa, an kan a! Niiy courtakana ke' kalwina, in way niyanta. ⁸ Puth niiy thamp way iiy-iiyaniy a! Niiy way yumpanyi niyantakamanweya! A' putha niiy yuk way min Christians wiy al-alantaman ma'-kuchathaniya! ⁹ Puth niiy ke' mee'miy ey? ya' ey? Pam wanch way paththaman iiy-iiyantana, an nil God.angan ke' kaliy thanang aak nungantamakana, a' nil puk nungantam ke'-ngul waa'-waa'iy thanangana! ya'a! In wik kan-kanama! Niiy ke' man-ngeeyān ngayang a! Pam wanch wiy anangana, way paththam iiy-iiyantana; wiyangiy-a, yuk ngeen-wiy thaa'-kuump-kuumpantan; wiy ananganiya maarich kee'-kee'antan; wiyiy-a, pul-pamam pi'-pi'wunpul ke' wanch pam yimanangan maarich kee'-kee'athwunpul, wiyiy nath-a, pul-wancham pi'-pi'wunpul ke' wanch pam yimanangan maarich kee'-kee'athwunpul. ¹⁰ Wiyangan-a, yuk way min wiyantam ma'-kuchathantan; wiy ananganiy-a, yuk way min min-minam anangan mee'-wak-wakantan, wiy ananganiy-a, ngak way mungkan iiy-iiyantana; wiyangiy-a, aak-ya'ang way waa'-waa'antan thanang, pam wanch wiy anangan; wiyangiy-a, piik-piikantan thanang wiy anangan a' yuk way min ngul mo'athantan thanttam. Than pam wanch wee'-wee'anangan way yimanangan yump-yumpantan-a, nil God.angan ke' kalow thanang, aak angan ke' wunwunayna nungantamangana, ya'a. ¹¹ Ka'athanaman-a, niiy wiy anangan way yimanangan iiy-iiyan, yumpan thaka, puth niiy yimanangana ya'-ngula, nil puth God.angana ngangk niyantamana kanam pachath; a' puk nungantam ngul waa' niyang, puth anpalmana nil Jesus Christ.an utham way niyantamakan, a' nil God.angana ke'-ngul

ngaantam-ngeey-ngeeyan way niiyan yump-yumpana a' Ngeen-Wiy Min nungantaman ngangk niiyantamang nana ngul wun-wunan.

Ngamp Ke' Kemp Thonam Iiy-Iiyamp Christ.antang Ngul, Ngamp Ke'-Paal Maarich Ke' Kee'-Kee'āmp Wiyantana

¹² Niiy nath ngaantam-ngeeyaniy niiyantakamanweya, “Ngay ngeen nathwey kaangk yumpāngan-a, an ngay yumpinga, an min ngatha.” Yaa, ngamp ngeen nathan ngaantam-ngeeyimp min yumpanakan-a, an ngamp yumpimpa. Puth kan in ngeeyāna: ngamp nath ke'-ngoongkam anman iiy-iiyimp ngamp want-wanttakan kaangk iiyāmpān-a, an min ya'a! Ngamp nath ngamparakam thonakam ngaantam-ngeeyimpwey-a, an ngampar min ya'a. Ngamp woyan anman ngamparakamana iiy-iiyimpan-a, an puth ngamp God.ana ke'am kuchekangan pi'-pi'anamp nunang, ya'a, puth ngangk ngamparamana woyan ngamparamakan kaangk paththam wun-wunan woyan aakanakaman thonakama. ¹³ An min ngampar may mungkanakan ey? Ee' kan-kanam a! Niiy nath ngaantam-ngeeyaniya, “Nil God.angan may minh yump ngampar, thip aakanakan mungkāmpa, a' nil thip yump ngampar may yipam mungkāmpa.” Puth may minh thakana, a' thip ngamparam anangan yaam wuniy ey? An ya'a, ngul minchowa, nil puth God.angan ngul wayathow may-a, minh-a, thip thampa. A' thon inan ngeeyāna: nil God.angan ngeenak yump ngampang a? Ngamp way yipam iiy-iiyāmp ey? maarich thak kee'-kee'āmp ey? An ya'a! Nil aakanakan ke' yump ngampang, ya'a! Nilan yump ngampang ngampān yipam wik ngeey-ngeeyāmp nunang, a' thaa'-kuump-kuumpāmp nunang, a' nilaniy yipam min-minam pi'-pi'ow ngampang. ¹⁴ Nil God.angan mulaman ekath nunang, Jesus.an, Lord ngamparaman, a'

nilana ngampang thamp mulaman ngul ekathow, nilana puth thayan paththama, mich pongam ya'a.

¹⁵ Niiy mee'miy ngula niiy puth pam wanch Christ.antam ngula, an nil moom niiyantam a! Nil ngangk niiyantang ngul wun-wunana! Kemp inangan kal-kalanamp-a, kemp ngamparakam ya'a! An kemp nungant thampa! An puth min ey? nil pam Christian alangana wanch maarich ke'athow nunang ey? wanch way anan ey? nil ma'-yotaman pam wiyantangan maarich kee'-kee'ana. An ya'a, in way paththama nunganta! An nil pamanganay yimanangan ke' yumpowa, puth nil ngangk kanam thee' Christ.anta, nil ke' kemp thonam yimanang ngul iyy-iyan Christ.antangan. ¹⁶ Niiy ngul ke' mee'miy ey? Nil pam wee'angan wanch way alantangan maarich kee'-kee'owwey-a, pul ke' thonam ngul iyy-iyanpula. Than lat ngench thayanangan engkanang waa'-waa'ina, "Pulan ke' thonam yimanangan weenowpul ngul."

¹⁷ Than puth wee'-wee'anangan Lord Jesus.an monkan-wak-wakantan-a, ngangkangan pi'-pi'antan nunang-a, an than karpam iyy-iyantant nungantang, ke' thonam anman.

¹⁸ Niiy maarich ke' kee'-kee'āna wanch thonantangan, puth niiy wanch inangana maarich ke' kee'-kee'āna pam thonantanga. Niiy ke' paththam yumpān yimanangan. Wiy way iyy-iyanamp-a, ma'-kuchathanamp-a, wik way waa'-waa'anamp thakan-a, an kan-kanam way iyy-iyanamp, puth ngamp nath maarich kee'-kee'imp thon-thonantangan-a, an nil-nil, way paththam yump-yumpanamp, kemp yam pekan wayathan ngampang. ¹⁹ Niiy puth ke' mee'miy ey? nil Ngeen-Wiy Min God.antamana, ngangk ngamparangan wun-wunan, kemp ngamparamweya ke' aawuch nungantam Ngeen-Wiy Min God.antam alantan nilan wun-wunan. Nil

God.angan kuch nunang ngangk ngamparangan wun-wunow. ²⁰ Niiyaniya moom niiyantakaman ya'a, niyiya pam wanch nungantam God.antama, nil moom ngamparam thonam anman, nil puth Jesus.an utham ngampar. Yaa, niiyana puth minam iyy-iiyāna, pam wanchangan yipam God.an pam pi'an ngaantam-ngeey-ngeeyayn nunang.

7

Ngay Wik Inan Thawang Niiyant Pam Wanch Ma'-Ampanam Al-Alantan-a, A' Puth Ma' Pam Wanch Al-Alantan Niiyanta

¹ Ngay kan wik thonan waa'āng niiyant, niiy puth lat kuchan ngathara, wikakanweya engkan ngathara. Nil pam nath ma'-ampanam iyyiwey-a, wanch ke'anang anman wun-wuniywey-a, an min nunganta. ² Puth in thampan ngeeyān ngula: aak town niiyantam nanan waya, Corinth nanana, puth pam wanch yot anangan Christians ya' anangan way-wayam paththam iyy-iiyantam, maarich thak kee'-kee'antan. Yaa, an puth min pam al-alantan wanchan maayayna, a' putha an min wanch al-alantan paman maayayna. Puth niiy ngul way iyy-iiyan thampa. ³ Nil pam-kunchana mak karpam wunow nungantanga wanch-kunchantangana, a' wanch-kunchana mak karpam wunow nungantanga pam-kunchantangana; pul karpaman mak wunowpul, an ya'an ke' thawiypul pulantakamana. ⁴ Nil wanch alangana kemp nungantamana ke' weekiy, nil moom nungantakama ke'am iyy-iiyan kemp nungantamakan nilan kal-kalan, ya'a, nil pam-kunchan moom ep iyy-iiyan kemp wanch thumantamakana. A' putha pam alangana kemp nungantamana ke' weekiy, nil moom nungantakaman ke'am iyy-iiyan, kemp nungantamakan nilan kal-kalan,

ya'a, nil wanch-kunchana ep moom iyy-iyan kemp pam nungantamakan. ⁵ Niiy ma' pam wanch karpam wun-wunāna, ya'ana ke' thaw-thawān niyantakamana. Niiy wiyiy nath wik yumpina, niiy nath manyam pokkapang wun-wunān, yaanweya, niiy yipam nathweya mee'-wuth-wuthanamin piip God.antana. Kanan-a, niiy putham ngul karpaman wunāna. Nath ya'wey-a, nil oony way alangan ngul thaach-thaach niyang maarich kee'anakan wiyantangana.

⁶ Ngay ke' thawing niyantweya wanchan maayāna, ya'a, niiy kaangk nathwey wanch thum maayānan-a, an epa min niyantwey. Niiy nathwey kaangk ke'an wanch thum maayān-a, yaa, an kana, niiy ma'-ampanam anman iyy-iyyāna. ⁷ Ngay kaangk niyang yotam ma'-ampanam iyy-iyyān ke' ngay yimanangan. Puth nil God.angan wiy-wiyam yot ma'-aath-aathan ngampangwey; wiy anangan-a, nil ma'-aath-aathan thanang ma'-ampanaman iyy-iyyayn; wiy anangan-a, nil ma'-aath-aathan thanangwey ma' wanch paman iyy-iyyayn.

⁸ Ngay inan thawang niyant pam wanch ma'-ampanam al-alantana, a' puth wukalongk al-alantana, an min niyant niiy anman pam thum ke'anangan iyy-iyyāna, nath wanch thum ke'anang iyy-iyyān ke' ngay yimanangan iyy-iyyang. ⁹ Puth niiy nathwey ke'-ngoongkam anman ngaantam-ngeey-ngeeyin niiy kaangk wanchan pi'-pi'ān thanangwey-a, yaa, kana, wanch thuman maayān niyant. Ya' nathwey-a, puth wanch al-alangan ngul ngangk mungkin niyang karpam wun-wunanakama.

¹⁰ Ngay kan ma' wanch thum al-alantan thawāng ngul, puth wik inan Christ.antam, wik ngatharam ya'a. Nil wanch thum alangana ke' wantiy nunang, pam thum nungantamana, ya'a. ¹¹ Nil nath wantiy nunangwey-a, yaa, nil pam thonangan ke'-ngul maayow, ya'a, nil

nath koyam yipam iiyow pam nungantamakana, ngul kul anpalana pul ngul nath michathuwpul pulantakaman; nath ya'wey-a, nil ma'-ampanam anman iiyow. A' nil pam thum alangana wanch thum nungantaman ke' too wantiy nunangwey aak umpuyamwey, ya'a.

¹² Ngay niyant wiy al-alantan thawāng thampa: puth nil Christ.angan ke'am waa' ngathar ngay wik wanttakan thawāng niyant, puth ngay kan ngaantam-ngeeyang ngatharakaman, a' wik inangan thawāng ngula: nil wanch thum pam Christian alantaman nath Christian ya' natha, nil wanchan nath kaangkwey karpam anman wun-wunow pam-kunchantangan-a, yaa, mak karpam wunowpul, nil pam alangan ke' too wantow nunangweya. ¹³ Nil pam thum wanch Christian alantamana nath Christian ya' natha, yaa, nil paman nath kaangkwey karpam anman wun-wunow wanch-kunchantangan-a, yaa, mak karpam wunowpula, nil wanch alangan ke' too wantow nunang. ¹⁴ Nil pam thum wanch Christian alantamana nath Christian ya'a, nil piip God.angan ngul thathow pulang ma' pam wanch anangan pul ke' thonam yimanangan iiy-iyanpul ngul a' paman thathow ke' nil minam ngul iiy-iiyana. A' puth wanch thum pam Christian alantamana nath Christian ya'a, nil God.angan ngul thathow pulang pulan ke' thonam iiy-iyanpul, a' nil wanchan thathowa ke' nil minam ngul iiy-iiyana. Nil God.angana yimanangan thathow pulangana, nil puth Christian alantanganwey wun-wunan. Nil God.angan ke'anwey thathiy pulang ke' kemp thonam anman iiy-iyanpul-a, nil puk pulantam anangan ke' ngaantam-ngeey-ngeeyiy thanangwey than ke' puk nungantam yimanangan, ya'a. Puth ya'a, than kan-kanamwey puk God.antam ngula. ¹⁵ Puth nil-nungant thonam anan Christian ya'ana nil nath kaangk wantow nunangana

nil-nungant Christian anan-a, an mak wantow nunang. Nil Christian alangan mak kuchow nunangweya, ke' ak-wichow nunang. Nil puth God.angan kaangk ngamp ngangk minangam wun-wunāmp. ¹⁶ Ngampan puth ke' mee'miy ngeen nathan wampiy thant Christian ya' alalantanweya. Nil wanch Christian alangan nath ma'-aath-aathow nunang pam thum Christian ya'anweya ngangkan thee'ow nungant God.antana, nath ya'a, a' nil pam Christian alangan nath ma'-aath-aathow nunang wanch thum Christian ya'ana ngangkan thee'ow nungant God.antana, nath ya'weya.

Niiy Ngeen Nathan Ka'athaman Iiyan-a, An-Aniyangan Nil God.angan Ump Niiyang Ngangkan Thee'an Nungant-a, Niiy Anman Iiy-Iiyān

¹⁷ Nil God.angan mi' ngampang work thon-thon aakanakan, a' nil wiy-wiyam yot ma'-aath-aathan ngampangwey, wiy anangan-a, nil ma'-aath-aathan ngampang ma'-ampanam iiy-iianamp; wiy anangan-a, nil ma'-aath-aathan ngampangwey ma' wanch thum iiy-iianampa; wiy anangan-a, Jews iiy-iianamp; wiy anangan-a, Jews ya' anangan iiy-iianamp; wiy anangan-a, slaves iiy-iianamp; a' putha wiy anangana, slaves ya'a. Nil God.angan want-wanttak nathan yumpiy niiyangan-a, niiyana anman iiy-iiyāna. Ngay wik inangan thaw-thawang niiyant yotamant churches nathan nathan wun-wuntan. ¹⁸ Nil God.angan ka'athaman ump niiyang ngangkan thee'-thee'ān nungantan-a, niiy wiy anangana, Jews iiy-iian, kompan thampa, puth ngeen-wiy niiyantamana ump-umpin niiyang; a' putha niiy wiy anangan-a, Jews ya' iiy-iian. Yaa, niiy nath Jews ka'athaman iiy-iian-a, niiy anman Jews iiy-iiyān, kompan thamp. Niiy nath Jews ya' ka'athaman iiy-iian-a, niiy Jews ya' anman iiy-iiyān, kompan ke'anang.

¹⁹ Nungkway ngamp Jew nathwey kompan thampwey-a, Jew ya'wey nathwey-a, kompan ke'anangwey-a, an ngamp yotamaniya wik min God.antaman ngeey-ngeeyāmp, a' mee' nungantang God.antangana min-minam iyy-iyyāmp. ²⁰ Niiy ngeen nathan ka'athaman iyy-iyyan-a, an-aniyangan nil God.angan ump niiyang ngangkan thee'an nungant-a, nath Jew natha, nath Jew ya'a, niiy anman iyy-iyyān. ²¹ Nil God.angan ka'athaman ump niiyang ngangkan thee'an nungant-a, niiy wiy anangana, slaves iyy-iyyan, puth moom niiyantamang wukalang kanam piyin niiyang workak. Yaa, kana, puth nil moom niiyantamangwey kaangk nath kuchow niiyangan-a, yaa, niiy mak iyyān. ²² Niiy wee'-wee'anangan slave iyy-iyyaniy-a, nil God.angan ke'am ngaantam-ngeey-ngeeyan niiyang ke' slave yimananganiya, ya'a, nil puth ngangk kanam pachath niiyang, way niiyan yumpana, niiy ngangk minam ngul iyy-iyyaniy puth way kan wantana. Niiy wee'-wee'anangan slaves ya'an iyy-iyyaniy-a, yaa, niiyana ke' slaves Christ.antam iyy-iyyaniy ngul, nilan puth moom niiyantam, puth niiy mak wik ngeey-ngeeyān nunang, putha work iyy-iyyān nungant thamp. ²³ Nil Christ.an utham ngamparwey-a, an ke' nil piy ngampang pam wanch nungantakama, puth wukalangana ya'a, puth chaapar nungantam alangan koyam piy ngampang oony way alantaman — yaa, nil Christ.an moom ngamparam ngula, ngamp nanpalaan wik pam way al-alantaman ke' ngeey-ngeeyāmpa! ²⁴ Yaa, niiy ngeen nathan ka'athaman iyy-iyyan-a, an-aniyangan nil God.angan ump niiyang ngangkan thee'an nungant-a, niiy nath Jew iyy-iyyan-a, nath Jew ya'a, niiy nath slave iyy-iyyan-a, nath slave ya'a, niiy anman ngul iyy-iyyāna. Nil God.an ngangk niiyantamang ngul wun-wunow a' ma'-aath-aathow

niiyang.

Ngay Wik Inan Thawang Niiyant Pam Wanch Ma'-Ampanam Al-Alantan, A' Wanch Wukalongk Al-Alantana

²⁵ Yaa, ngay kan thon inan waa'āng niiyanta, niiy wikakanwey engkan ngathar pam wanch ma'-ampanam al-alantamana. An nil Christ.angan ke'am waa' ngathar ngay wik want-wanttakan thawāng niiyanta, puth ngay kan ngaantam-ngeey-ngeeyang ngatharakamana, a' ngay waa'āng niiyant ngul. Niiy wik ngatharam ngeey-ngeeyāna, nil puth God.an min iyy-iiy ngathara, a' putha workan ma' ngatharang thee' ngul. ²⁶ Aak yimanan-gana way ngul wun-wunan ngampar, puth pam wanch wiyangana way yump-yumpantan niiyant, ngay ke'-paal ngaantam-ngeey-ngeeyang ngatharakaman an min niyantweya niiy ma'-ampanam anman iyy-iiyānana. ²⁷ Niiy puth pam wiy al-alangan nath wanch thum ka'athaman maayana, yaa, an kana, niiy wanch thum niiyantaman ke' want-wantān thanang. Puth niiy nath wanch ke'anangwey iyy-iiyin-a, yaa, niiy puth wanchakana ke' wenk-wenkān, niiy yipam wanchan maayān thanang. ²⁸ Puth niiy nath wanch thuman maayin thanangan-a, yaa, an kan, an puth way ya'a, an min niiyanta, a' puth niiy wanch ma'-ampanam al-alangan nath pam thuman maayinweya, an kana, an way ya'a, an min niiyanta. Puth niiy wee'-wee'anangan ma' wanch thuman iyy-iiyaniy-a, wiyiya aak way wampow niiyant. A' niiyana ngangk way ngul iyy-iiyānwey, puth ngay yimananangan kaangk ke' thathāng niiyang ngangk wayan iyy-iiyān niiyantakamana.

²⁹ Ngurp ngatharam niiyalang, ngay puth wik inan waa'āng niiyanta: aakan thinth ngul nil Christ.an palaman wampowa. Yaa, niiy kan ke'-ngoongkam monkan-wak-wakān nunang, ngangkangam pi'-pi'ān

nunang putha ngaantam-ngeey-ngeeyān nunang. Niiy nath wanch thum thamp-a, niiy wanch thum niiyantaman thonakam ke' ngaantam-ngeey-ngeeyān thananga, niiy Christ thampan ngaantam-ngeey-ngeeyān nunang, a' work iyy-iiyān nungant thampa ke' pam ma'-ampanam yimanangana work iyy-iiyāna. ³⁰ Niiy nath ngangk way-wayam paththam wuninwey-a, peey-peeyin thakan-a, ngangk way yaaman ke' wun-wunow niiyant. Ke' ngaantam-ngeey-ngeeyān yaaman ya'a, kon-ngathow ngul niiyang. Nath ngangk min ngul wun-wunow niiyant-a, yaam ke'a ngaantam-ngeey-ngeeyān niiyantakamana, ya'a, Christ thampan ngaantam-ngeey-ngeeyān nunanga. Niiy nath yuk way min min-miniy kan piyy-piiyaniy niiyantakaman-a, yaa, niiyiya yuk way min yaaman ke' ngaantam-ngeey-ngeeyāna, ya'a, niiy Christ.an ngaantam-ngeey-ngeeyān nunang thampa. ³¹ Niiy nath pam ma'mangkiya, nath wukal yot pi'-pi'aniya, putha yuk way min yot ngul thamp pi'-pi'aniya, niiy yaaman ke'a wukal thakan ngaantam-ngeey-ngeeyāna. Puth aak inman ngampan wun-wunanampa yaam ke'-ngul wunowa, ya'a, aak inan ngul minchowa a' wiy-wiyam ngul weenow aak inana.

³² Ngay kaangk ke' niiy ngangk wayan iyy-iiyāna. Nil pam ma'-ampanamana ke'-ngoongkam work Christ.antan iyy-iiyan, nil puth kaangk ngangk min yumpow nunang, Christ.an. ³³ Puth nil pam wee'an wanch thum thampan iyy-iiyan-a, nil wukala a' yuk way mina aak imanaman ngaantam-ngeey-ngeeyan thampa, nil puth kaangk wanch nungantaman ngangk min yumpow nunang, ³⁴ ke'-paal nil thon-thonan ngaantam-ngeey-ngeeyan, nilaniya Christ.an ngaantam-ngeey-ngeeyan, a' nil anana wanch thum thamp ngaantam-ngeey-ngeeyan, kucham al-alangana ak-wichanpul nunang pal-puy.

Puth nil wanch pik-ke'anangan-a, ke'-ngoongkam work Christ.antan iyy-iian, nil puth kaangk ngangk punch-aakaman thee'ow nungant a' monkan-wak-wakow nunang thamp, nil ngaantam-ngeey-ngeeyan Christ.an moom nungantam kemp nungantamakan, a' putha ngangk nungantamakan thampa. Puth nil wancha pam thum thampan iyy-iian-a, nil wukal-a, a' yuk way min thakan ngaantam-ngeey-ngeeyan thampa, nil puth kaangk ngangk min yumpow nunang, pam thum nungantamana.

³⁵ Ngay puth wik inangan thawang niyantana ngay puth kaangka ma'-aath-aathāng niyangweya, ngay ke' wik thayan yimanangana ke'am yump-yumpang niyantana, ya'a. Ngay wik waa'ang niyant niy yipam mi'ān woyan minan want-wanttinan uwān niyantakamanweya. Ngay kaangk niy ke'-ngoongkam work minam iyy-iyān nungant Christ.antan, ngangk punch-aakaman thee'ān nungant, a' ke' eenchān nungantam.

³⁶ Ngay thon inan waa'āng niyant. Pul pam wanch kan nath wik yumpiypul pulantakaman ngentwunakana. A' nil pam nath thawiy ngul, “Ngay ke'a, ngay anman ma'-ampanam ngul iyy-iyānga.” Puth nil pam ilangan nathwey ke'-ngoongkam anman ngaantam-ngeey-ngeeyiy nil kaangk wanchan pi'ow nunangwey-a, wanch alangan nath ngangk mungkiy nunang karpam wunwunanakaman-a, yaa, kana, wanchan maayow nungantakam. An way ya'a, an ep min nunganta. ³⁷ Puth nil pam alangaman nathwey ngaantam-ngeeyiy nungantakamana nil kan-kanam kaangk ma'-ampanaman iyyow-a, wanch ke'anangan-a, nil ke'an ngaantam-ngeeyow pi'ow nunangwey-a, yaa, an mak ma'-ampanam anman iyyowa, an min nunganta. ³⁸ Nil pam wee'ang nath wanchan maayow nunangwey-a, an mina. Puth nil wee'-

nathan ma'-ampanam iyyow-a, wanch ke'anangan-a, an min paththama.

³⁹ Nil wanch pam thum thampana, pul ke' thonam anman iyy-iyanpul, nil wanch alangan pam thonangan ke' maayowa. Nil pam-kunchan uthamowanwey-a, an epa, nil kaangkweya pam thon ngulan maayowwey-a, an mak maayow nunang, puth nil pam Christian.an maayowa, wiy ya'a, nil pam nath Christian ya'anwey-a, ke' maayow nunang, ya'a. ⁴⁰ Puth ngayan ngaantam-ngeeyang ngatharakamana an nath min nunganta wukalongk anman iyy-iyyow, pam ke'ananga, nil yimanangana an ngangk min anman wun-wunow nungantweya. Ngay puth ngaantam-ngeeyang ngatharakamana ke' nil Ngeen-Wiy Min God.antamana nath wik yimanangan thawa ke' ngay wik inman thaw-thawang niyantana.

8

Ngay Wik Inan Waa'āng Niiyant Minh Alantaman

¹ Ngay kan wik thon in waa'āng niiyant, niiy wikakanweya ka'athaman engkan ngathar, an nath min niyantweya, nath ya'a, minhan mungkān than wiyangan kanaman thee'in yuk ngeen-wiy thanttamakana. Niiy thawaniy ngamp Christians mee'miy iyy-iyanamp minh anangan mina mungkanakana. Ee', an kan-kanama, puth nil wee'ang nath ngaantam-ngeey-ngeeyiy nungantakaman nil kuchek waap pi'an thamp-a, an nil ulp-ulpanang iyy-iyyiy, nil pam wanch wiy anangan ke' ma'-aath-aathiy thanang, ya'a. Puth nil wee'-nath ngangk minangam iyy-iyyow wiy al-alantan-a, an nil ep ma'-aath-aathan thanangana. ² Nil wee'ang nath ngaantam-ngeey-ngeeyiy nungantakaman nil yotan mee'miy-a, an ya'a, nil pam anana ngoongk-ngoongkam iyy-iyyiy, nil ke' mee'miya, ya'a. ³ Puth nil wee'-nath piip God.antan kan-kanaman

kaangk wun-wunow nungantan-a, an nil God.angan puk nungantam ngul waa'-waa'ow nunang.

⁴ Yaa, ngamp kan wik inan putham ngul ngaantam-ngeey-ngeeyāmp minh anangan than wiyangan kanaman thee'in yuk ngeen-wiy thanttamakana. Ngamp mee'miy wunanamp yuk ngeen-wiy thanaman yump-yumpantan thakana, an than man-yetham ke'am iyy-iiyantān, ya'a; nil God thonam anman thonakama, wiy ya'a. ⁵ Pam wanch wiyangan ngaantam-ngeey-ngeeyantan ke' gods yot anangan man-yetham wun-wuntan, in kenyaana, a' putha in pekana, ⁶ puth ngampaniya mee'miy nil God thonam anman thonakam, piip ngamparamana. Nilaniya pam wancha a' putha yuk way min ma'mangkam nilam yump-yump. Nil pam wanch yumpa ngamp yipam thaa'-kuump-kuumpāmp nunang a! A' putha nil Jesus Christ.ana moom thonam anman ngampar yotamantana. Nil Jesus alangana yuk way min ma'mangkam yump, puth nil piip nungantam God.an thaw nungant yimanangan yumpowa. Nilam thampana kaa'-piichanath ngampang, ngamp yipam pam wanch nungantam iyy-iiyāmp ngula.

⁷ Puth pam wanch Christians wiyangan ke'am yippak min-minam paththaman ngaantam-ngeey-ngeeyantan. Than nathpalmana yuk ngeen-wiy ngaantam-ngeey-ngeeyantan thanang ke' man-yetham iyy-iiyantān. Ngul than al-alangaman nath minhan mungkiythana, than wiyangan kanaman thee'in yuk ngeen-wiy thanttamakan-a, an than ngaantam-ngeey-ngeeyiythan ke' than yuk ngeen-wiy anangan thaa'-kuumpantan thanang, an thananiya-a, ngaantam-ngeey-ngeeyantan thanttakaman ke' than way-wayam paththam iyy-iiyantān. ⁸ Nil minh alangan-a, thinthaman ke' wampathow ngampang piip God.antana, ya'a. Nungkway ngamp minhan mungkipwey-a, nath ya'wey-a, nath

ke'wey mungkim-p-a, puth minh alangan thinthaman ke' wampathiy ngampang piip God.antan, ya'a.

⁹⁻¹⁰ Niiy nath ngaantam-ngeey-ngeeyaniy ngul an min niiyant minh mungkanakan than wiyangan kanaman thee'in yuk ngeen-wiy thanttamakanweya. Puth ngampanweya kana ngaantam-ngeeyāmp thanangweya pam wanch Christians wiy anangan ke'am yippakan min-minan ngaantam-ngeey-ngeeyantana. Than nath thathiythan niiyangweya minhan mungkin-a, yaa, than woyan niiyantaman anman wakiythana, than thampana mungkiythan ngula. A' puth anpalana than ngangk way ngul wun-wuniythan, puth thanan ngaantam-ngeey-ngeeyiythan thanttakaman ke' way-wayam pattham iyy-iyantana. ¹¹ Niiy nath ulp-ulpanang ngaantam-ngeeyin niiyantakaman ke' mee'miy niiy iyy-iyaniy-a, a' minh anangan mungk-mungkin-a, niiy nath wayathin thanang wiy anangan, puth thananiy natha woyan Christ.antaman ke'-ngul wak-wakiythana, ya'a. Ngamp ke' wayathāmp thanangweya, puth nil Christ.ana thant thamp uthama. ¹² Niiy nath yimanangan wayathin thanang-a, an niiy Christ.antan way yumpaniy thampa. ¹³ Ngay inan ngaantam-ngeeyang ngatharakama: ngay ke'-ngul minh mungkāng than wiyangan kanaman thee'in yuk ngeen-wiy thanttamakana. Ngay nath mungkingwey-a, ngay nath Christians wiy anangana wayathing thanang, thananiya natha woyan Christ.antaman ke'-ngul wak-wakiythan, ya'a. Ngay ke'-paal ke'-ngul mungking, puth ngay kaangk ke' wayathāng thanang.

9

Ngay Wik Inangan Waa'āng Niiyant Nganttam Pam Il-lantam Work Christ.antan Iiy-Iyinan

¹ Pam wanch wiy al-alangan waa'antan ngayang ke' pam min ya'a, puth thananiy-a, moom ngatharam ya'a. Nil moom ngamparam alangan Jesus.angan kuch ngayang wik nungantaman waa'-waa'āng. A' puth ngay mee' ngatharamang kan thathang nunang nilan wamp ngathar. Ngay ka'athaman wik Christ.antaman waa'-waa'ang niyantana, a' anpalaniya niy ngangk ngul thee'-thee'an nungant Christ.antana. ² Pam wanch wiyangan ngaantam-ngeey-ngeeyantan nil ke' Christ.angan ke'am kuch ngayang, an puth ya'a, nilam kuch ngayanga. Ni-yaniya Christians ngul iyy-iyaniya, yaa, an meenathan nil Christ.angan kan-kanam kuch ngayang, ngay puth ka'athaman wik nungantaman waa'-waa'ang niyant, a' anpalaniya niyana ngangk ngul thee'-thee'an nungant. Yaa, an puth niyana kan-kanam ngaantam-ngeey-ngeeyān ngayang pam nil God.angan kuchanya!

³ Pam wanch wiyangan waa'-waa'antan ngayangwey-a, ngaywey wik yimanangan thaw-thawang thantana: ⁴ an-ngul wanttaka a? An-ngul min ya' ey? Pam wanch Christians wiy al-alangan may minh thakan thee'-thee'iythan ngathan ey? ngay puth work iyy-iyyang Christ.antan. An ep mina mayan thee'-thee'antan ngathweya. ⁵ A' pam God.antam wiy al-alangan wanch thum thantam karpam kal-kalantan thanang, thanan pal-puy iyy-iyyantan wik God.antaman we'-we'arathantan — than al-alangan, Petera a' kuunch Jesus.antama a' wiy anangan nil God.angan kuch thanang workan iyy-iyyayn nunganta. An puth ngath mina yimanangan wuniy, ngay wanch thum thampan iyy-iyyingweya. ⁶ A' pu-ungk wiy al-alangan ep-paththam wukal uw-uwantan pam wanch Christians wiy al-alantaman, than puth wik God.antaman waa'-waa'antan thant. Ngan Barnabas.ang thonakamwey wukal churchaman ke'am uw-uwanan,

nath ngeey-ngeeyinweya. Ngan kaangk ke' wayathān niyangana, puth niy Christ.an ke'-ngul monkan-wak-wakin nunanga ke'-paal ngan ke' thawin niyant mayak thakan, puth ngana ep kaangk niy wik ngeey-ngeeyān Christ.antamana. Nungkway ngan meech nath iyy-iiyin-a, nath wukal ke'anang iyy-iiyin-a, an kana, ngan ke' thawin niyantana. ¹³ Than pam anangan workan iyy-iiyantān aawuch ngench thayanang angan-a, than may minh wiy anangan mungk-mungkantan than wiyangan wampathantan aak altar aakanakan. ¹⁴ A' aakan yimanangan wunana, nil puth moom ngamparam Christ.an wik inangan thaw ngampar: than wee'-wee'anangan work nungantam iyy-iiyantān-a, wik nungantaman waa'-waa'antan pam wanchantan-a, than may-a, wukal thakan uw-uwayn than ttam al-alantaman than wik nungantaman ngangkangan pi'-pi'antana.

¹⁵ Puth ngay ya'a, ngay nathpalman ke'am thaw-thawang niyantān mayak thakana, a' ngay mayak thakan ke' thawing niyant lat inaniy ump-umpang. Ngay nath may ke'anang wun-wuningweya, nath uthamingwey-a, an kana, an min ngatha ngay wik God.antaman yimanaman waa'-waa'āng niyanta, an ngangk min wunan ngathara. ¹⁶ Ngay wik God.antaman waa'-waa'anga, ngay ulp-ulpanangan ke'am iyy-iiyang, ya'a. Nil puth God.an thaw ngathar wik minan waa'-waa'āng niyanta, puth ngayaniy-a, mak waa'-waa'āng niyantana. Ngay ke'wey nath wikan waa'-waa'ing-a, an ngangk ngatharamana way-wayam paththam wun-wuniya. ¹⁷ Ngay nath ngatharakaman mi'ing wik God.antaman waa'-waa'ing niyantān-a, an ep ngay wukal uwing; puth ngay ngatharakaman ke'am mi'ang, ya'a, nil God.angan mi' ngayang, nil workan ma' ngatharang thee'a. ¹⁸ Ngay puth ngeen ngul uwāng a? Wukal ya'a, an kana, ngay ngangk min

paththam iyy-iiyanga, ngay puth wukal ke'anang wik God.antaman waa'-waa'ang niyantana, ngay ke'am thaw-thawang niyantana wukalakana.

¹⁹ Than pam wanch wiy anangan ke' moom ngath-aram yimanangan ke'am iyy-iiyantana, ya'a, than ke'am thaach-thaachantan ngayang wik minan waa'-waa'ānga, ngayan ep kaangk wikan waa'-waa'āng thanta. A' ngay puth pam wanch yot ma'-aath-aathang thanang, puth anpalan ngayan kaangk than pam wanch yotangan Christ.an monkan-wak-wakantan nunang ngula. ²⁰ Ngay Jews.antang wun-wunang-a, yaa, ngay aak woyan thant-tam anman wak-wakang, than yipam wik Christ.antaman ngeey-ngeeyayna, a' monkan-wak-wakayn nunang ngula. Puth ngaya Christ ngul monkan-wak-wakanga, ngay wik Moses.antamana ke'-ngul monkan-wak-wakāng, ya'a. Puth ngay wun-wunang thanttang al-alantangan wik thayan nungantaman pi'-pi'antan-a, ngay thampang wik nungantaman pi'-pi'ang, than yipam wik Christ.antaman ngeey-ngeeyayna. ²¹ Ngay pam wanch Jews ya' al-alantangan wun-wunangan-a, ngay aak woyan thant-tam anman wak-wakang, than yipam wik Christ.antaman ngeey-ngeeyayn. Puth ngay woyan min thanttam anman wak-wakang, aak woyan way thanttaman ke'am wak-wakang, ya'a, ngay aak woyan Christ.antam anman wak-wakang. ²² Ngay Christians wiy al-alantang wun-wunangan-a, thanan ke'an yippak min-minan ngaantam-ngeey-ngeeyantan-a, ngay ke'am wak-wakang thanang-weya. Ngay woyan min wak-wakang mee' thanttangana, than yipam Jesus Christ.an minam monkan-wak-wakayn nunang. Ngay kaangk pam wanch yot al-alangan wik Christ.antam ngeey-ngeeyayn a' monkan-wak-wakayn nunang, ngay ke'-paal nyiin-nyiinang thanttanganiya wik thanttaman ngeey-ngeeyang, aak woyan thantta-

man wak-wakang, than yipam wik Christ.antam ngeey-ngeeyayn ngayan waa'-waa'āng thantana.

²³ Ngay yimanangan iiy-iiyang ngay puth kaangk yotamangana Christ.an monkan-wak-wakayn nunanga, puth anpalmaniya ngay ngangk min ngul wun-wunāng. ²⁴ Niiy kan in ngeeyāna: pam anangan race.an mo'-mo'antana, than othamayan ke'-ngoongkam anman mo'-mo'antan, nil puth pam thonam anman yuk way minan uwowa. Niiy yimanangan ke'-ngoongkam anman Jesus Christ.an monkan-wak-wakān nunang, niiyan yipam nungantang angman wun-wunān aak umpuyam. ²⁵ Than pam anangan race.an mo'-mo'antana, than ka'athaman-a, kemp miyalathwuntan, kemp minam yipam mo'-mo'ayn. Than nath yuk way min uwaynan-a, yaa, an min thanta; puth yuk way min anangana aak umpuyamana ke' wun-wuniythana, ya'a, an ngul wayamayn; puth ngamp nath Jesus Christ.an ke'-ngoongkam anman monkan-wak-wakāmp nunangan-a, an epa ngamp aak umpuyam wun-wunāmp aak Jesus Christ.antamangana. ²⁶ Ngay ke'-paal woyan koochan anman wak-wakang, ngay ke' palpuyan woyan wak-wakanga ya'a, ngay mel ke' enchāng thaka, woyan thonakan ya'a. Ngay ke' pam anan kampan mo'-mo'an yuurpam yuk tape aakanakaman moomangan wunpana. Ngay thaa'-thengkanang ke'am work inaniy iiy-iiyanga, ya'a, puth yaan thonakaman ya'a, ²⁷ ngay ke' pam anana ma'angan thanp-thanpan nungamangana, ngay yipam wayana ke'-ngul yump-yumpānga. An ngayan nath way iiy-iiyingwey-a, nil God.angan ke' nath kalow ngayang aak min nungantam aakanakana. Nungway ngay wik nungantam waa'-waa'ang pam wanch wiy al-alantan-a, an ke' nath kalow ngayang aak nungantamakana.

10

Ngamp Yuk Ngeen-Wiy Anangan Ke' Thaa'-Kuump-Kuumpāmp Thananga!

¹ Niiyalang, ngay kaangk niy wuut mangk ngamparam yotam anangan ngaantam-ngeey-ngeeyān thananga aak keenkanaman wun-wunina. Nil God.angan yuwana eep-eep wunp thantana yipam woyan anan meen-meenathow thanta. Nil yuwana umputh iyy-iyy thantanweya um wo'uwakan Red Sea aakanakan. A' than yotam wo'uwayn minam matin nil puth God.angan woyan e' yump thant wo'uw um-menhangana. ² Nil Moses.angan woyan wakan thakan kal-kal thanang, nil moom thanta. In ke' yimanan-gana, than wiyangan kootra kuungkantan ngampangan-a, anpalana nil Christ.an moom ngamparam iyy-iyyan ngul, ngamp wik nungantaman ngeey-ngeeyāmp. Inan puth yimanangana: than keenkanaman monkan-wak-wakin nunang Moses.ana, nil moom thanttaman iyy-iyya, a' than wik nungantaman ngeey-ngeeyin. ³ Than yotamang may manna anan mung-k-mungkin nil God.angan aak inpal kenyan kuch thant. ⁴ A' than ngakam ngul uth-uthamin-a, than ngakan mungkin kunttow anpalan ngak mee' pich thanta, kunttow anan nil God.angan meenath thant. Nil Christ.an ke' kunttow thayan anana puth nilana ngak thakan kuch-kuch thant. A' putha nil thanttangan iyy-iyy, minaman pi'-pi' thanang. ⁵ Puth nil God.antan ngangk min ke'am wunanta pam wanch al-alantamana, ya'a; than puth wik nungantaman minam ke'am ngeey-ngeeyin, ya'a; a' pam wanch chil yot anangan uthamin aak pintalang angman. Pam wanch mul anangan-a, aak pintalang angman pal-puy wun-wunina.

⁶ Ngamp ngaantam-ngeeyāmpa nil God.angan way-wayath thanang, ngampan-a, yimanangan ke' iyy-iyyāmp

ke' thanan yimanangan iyy-iyyin way-wayamana, ngamp ke' ngaantam-ngeey-ngeeyāmp wayan yump-yumpāmp thaka ke' thanan ngaantam-ngeeyina. ⁷ Than wiy al-alangan yuk ngeen-wiy thaa'-kuump-kuumpin. Lat ngench thayanangan waa' thanang than minh calf many yumpin yuk goldama, a' thanana thaa'-kuump-kuumpin nunang ngul, may pi'an mungkin, a' ekin ngul a' kee'-kee'in. Puth ngampan ke'a yuk ngeen-wiyān thaa'-kuump-kuumpāmp a! ⁸ Than wiy anangan maarich kee'-kee'in wanch thon-thonanta a' anpalaniya kinch thonamangan-a, than yot anangan mul keek-keekin, pam wanch thaa'-wantanam, twenty-three thousand. Ngamp ke' wayan iyy-iyyāmpa pam wanch wiy al-alantangan, ke' than yimanangan wayan iyy-iyyina. ⁹ Than wiy anangan way iyy-iyyin, thanan ngaantam-ngeey-ngeeyin, “Nil God.an nath man kul ke' wampowanta!”, puth an-aniyangan-a, God.antan man kul paththam wampanta a' thuukangan path-pathin thanang, a' thanana uth-uthamin ngul. Yaa, ngamp ke' iyyāmp ke' than yimanangan iyy-iyyin. ¹⁰ Than wiy anangan aak-pik-waa'in, a' nil God.angan ngaantiyongk nungantam kuch thant mul-mulathow thanang. Ngampan ke' aak-pik-waa'āmpa, ya'a!

¹¹ Than aak keenkanaman lat ngench thayanangan waa'-waa'in nil God.angan yotam wayath thanang, ngamp yipam ngaantam-ngeey-ngeeyāmp thanang a' putha ngampana ke' wayan iyy-iyyāmp ke' thanan way-wayam paththaman iyyin. Puth aakan thinth kan-ngul wamp-wampam ngampar aak inan minchowana.

¹² Niiy wee'-wee'anangan nath ngaantam-ngeeyaniy niiyantakamana niiy minam anman woyan God.antaman wak-wakaniy-a, niiy thath-thathān niiyantakamana. Puth niiy thampang ngul way iyy-iyyan. ¹³ Niiy wiyiya

nath ngaantam-ngeey-ngeeyān way yumpanakan. Puth niy thonakam ya'a. Nathpalmana, in-inman pam wanch puk yotamangan ngaantam-ngeey-ngeeyantan way yumpanakan, way wiy-wiyam thakan yumpanakan. Puth inan thamp ngaantam-ngeeyāna: nil piip God.an pi'an paththam, a' nil kan-kanam minam ngul ma'-aath-aathow niyangan ke' nil keenkanaman thaw. Niiywey nath ngaantam-ngeey-ngeeyin way yumpanakan-a, nil God.anganiya ngangk thayanathow niyang, niy yipam way anangan thaamp-thaampān thanang. Nil ngul ma'-aath-aathow niyang niy ke' yipam wayamān.

¹⁴ Niiyalang, ngurp ngatharam-ang, ngay puth thawang niyant niy yuk ngeen-wiy anangana ke' thaa'-kuump-kuumpān thanang. Niy thintham ke' wampān thant thanan thaa'-kuump-kuumpantan yuk ngeen-wiy anangan. ¹⁵ Niy pam wanch kuchek waap mina, yaa, kan niy ngaantam-ngeey-ngeeyān wik inangan ngayan thawāng niyant. ¹⁶ Ngamp may ngak a' may bread mung-k-mungkanamp churchangan-a, ngamp God.an thaa'-kuump-kuumpānamp a' thankyou thaw-thawanamp nungant. Ngamp may ngakan mung-k-mungkanamp-a, nil Christ.an ngamparangan karpam wun-wunan, nil puth chaapar nungantaman theetath ngampar. Ngamp may breadan thuth-thuthanamp a' mung-k-mungkanamp ngulan-a, ngamp ke' thonam yimanangan iiy-iyanamp nungantang nil puth kemp nungantam thamp theetath ngampar. ¹⁷ Ngamp may bread thonam anpalan may thuth-thuthanamp. In aak yimanangan wunan: nungkway ngamp pam wanch yot anangan-a, ngamp ke' thonam yimanangan iiy-iyanamp ngul Jesus Christ.antang.

¹⁸ Niy pam wanch Jews anangan ngaantam-ngeey-ngeeyān thanang. Than minh thakan wamp-

wampathantan aak altar aakanakan a' thanan-a, minh many mungkantan, than puth piip God.an thaa'-kuump-kuumpantan, a' ngaantam-ngeey-ngeeyantan nunang.¹⁹ Ngay puth nanpalan thaw-thawang niiyantana yuk ngeen-wiy thakan ke' thaa'-kuump-kuumpāna! Than yuk ngeen-wiy anangan man-yetham iyy-iiyantān ey? An ya'a! Niiy nath may minh thakan kalān yuk ngeen-wiy al-alantan-a, an min niiyant ey? An ya'a!²⁰ Puth ngay inan thawang niiyant: than pam wanch Christians ya' al-alangan may minh thakan kal-kalantan yuk ngeen-wiy al-alantan-a, an than oony way al-alantan may thakan thee'-thee'antan, a' thaa'-kuump-kuumpantan thanang, God.an ya'a. Ngay kaangk ke' niiy oony way anangan thaa'-kuump-kuumpān thanang a' monkan-wak-wakān thanang thampa.²¹ Ngamp oony way anangana a' puth God.ana ke' karpaman thaa'-kuump-kuumpimp thananga. Ngamp kan ka'athamana mi'āmpa ngamp wee'an kaangka thaa'-kuump-kuumpāmp nunanga. Ngampweya pam wanch piip God.antaman iyy-iiyimpwey-a, yaa, an ep-paththam may breada putha may wine.an mungk-mungkāmpa, a' ngaantam-ngeey-ngeeyāmp nunang a' putha thaa'-kuump-kuumpāmp nunang thamp, wiy anangan ya'a. Ngamp thonam anman mi'āmpa.²² Ngampan puth ke' man kulan yump-yumpāmp nunang, God.ana. Ngamp ngaantam-ngeey-ngeeyanamp ngamparakaman ke' ngamp thayan paththam iyy-iiyanamp ke' nil yimanangan ey? An ya'a!

²³ Niiywey nath ngaantam-ngeeyaniy niiyantakamana, “Ngay ngeen nathwey kaangk yumpingan-a, an ngay-ngaya, yumpinga.” Yaa, niiy nath wik yimanangan thaw-thawaniya, puth niiy kan in ngeeyāna: ngamp nath ke'-ngoongkam iyy-iiyimp want-wanttakan ngampan kaangk iyyāmp-a, an min ya' ngampar. Ngampwey woyan ngam-

parakam anman iyy-iyimpanwey-a, an nath ngamp ke'ngul ngaantam-ngeey-ngeeyimp nunang God.ana, ya'a, a' putha pam wanch wiy anangan thampa minam ke' ma'-aath-aathimp thananga. ²⁴ Ngamp puth ngamparakam thonakam ke' ngaantam-ngeey-ngeeyāmp, ngamp pam wanch wiy anangan thampa minam pi'-pi'āmp thanang puth-a, ma'-aath-aathāmp thanangweya.

²⁵ Niiy in thampan ngeeyāna: niiy nath kaangk minh piyān store.am anpalan-a, niiy ep piyān. Niiy ke' ngaantam-ngeeyān than wiyangan nath minh ka'athaman thee'in yuk ngeen-wiy thanttamakana, nath ya'a, a' niiy ke' engkān thant, wik ke'anang piyāna. ²⁶ Puth aak inan God.antama, a' nilaniya ma'mangkam yump, may-a, minh-a, yuk way min ma'mangkam anangan thampa.

²⁷ A' putha inan thampan ngeeyāna: than pam wanch Christians ya' anangan nath thawiythan niyant may mungkān thanttangan-a, niiy nath kaangkwey-a, yaa, niiy iyyāna, a' mungkān may minh thanan thee'ayn niyant. Niiyan ke' engkān wik yimanangana, “Minh inangan than ka'athaman kanam thee'in yuk ngeen-wiy alalantan ey?” ²⁸⁻²⁹ Puth nil wee'-nathan thawiy niyant, “Than wiyangan minh inangan ka'athaman yuk ngeen-wiy thanttamakan kanam thee'ina,” yaa, puth niyana minh anangan ke' mungkāna, too wantāna. Puth nil ngul ngaantam-ngeey niyang niiyan way yump-yumpaniya, puth niiy minh ngenchan mungkana, a' ngangk way ngul wunowanta. Puth niiyan natha wik yimanangan ngaantam-ngeeyina, “In ya' natha! Ngay puth ngeenam ke'an mungking e? Kanaka nil nath ngaantam-ngeeyiy ke' ngay way yump-yumpanga, puth an kana, ngay mak mungkānga! ³⁰ Ngay nath thankyou thawāng God.antan may minh aakanakan-a, pam wanch wiyangana ke' waa'-

waa'iythan ngayanga, ya'a! — ngay puth thankyou kan thawang nungant God.antana.” Niiy nath yimanangan thaw-thawaniya.

³¹ Ngay putha inan thaw-thawang niiyant: niiy want-wanttin mi'ān-a, niiy nath mungkāna, nath ya', a' puth niiy ngeen nathan yumpān-a, niiy God.ana ngaantam-ngeey-ngeeyān nunang, a' thaa'-kuump-kuumpān nunang. ³² Niiy minam iyy-iiyāna, niiy way ke' iyy-iiyān mee' wiyantangana, nath Jews al-alantangan, nath Greeks al-alantangan, nath Christians wiy al-alantangan. Puth niiy nath wayan iyy-iiyinwey-a, thanan putha Christ thampan pam way ngaantam-ngeey-ngeeyiythan nunanga. ³³ Niiy woyan ngatharam maakāna. Ngayaniya, kaangk minam iyy-iiyāng mee' yotantang, ngay ngatharakaman ke'am ngaantam-ngeey-ngeeyang, ya'a, ngay pam wanch wiy anangan ngaantam-ngeey-ngeeyang thanang, minam ma'-aath-aathāng thanang than yipam wik God.antaman ngeeyayna, ngay puth kaangk nil God.angan yot anangan kaa'-piichanathow thanang.

11

¹ Niiyan woyan ngatharam maakāna, ke' ngay woyan Christ.antaman wak-wakang.

Than Wanch Anangan Kuchek Kanganam Iyy-Iiyayn, Aak Churchangan

² Ngay ngangk min wun-wunang niiyantamana a' thaa'-kuump-kuumpang niiyang niiy puth konangam pi'-pi'aniy ngayang a' putha niiy wik Christ.antaman ngeey-ngeeyaniy ngula a' woyan nungantam ngul wak-wakaniy ngayan thaa'-aath-aathang niiyangana.

³ Puth niyy wik inangan ngeey-ngeeyāna: nil Christ.ana moom pi'an ngamparam pam yotamantamana, aak umy-ompanaman pam wuntana, a' putha pam anangan-a, moom iyy-iiyantana wanch thanttamakana a' putha nil piip God.an-a, moom nungantam Christ.antama. ⁴ Yaa, niyy pam anangan mee'-wuthanamān God.antan aak churchangan-a, niyy hat ke' ngoonchān thampa. A' putha niyy hat thampana ke' wik God.antaman waa'-waa'ān churchangana. Niiy hat nath ngoonchinwey-a, an niyy meenathaniy pam wanchantana niyy Christ.an pam pi'an ke'-ngul ngaantam-ngeey-ngeeyaniy nunangana, ya'a. ⁵ Puth niyy wanch anangan mee'-wuthanamān-a, aak churchangan-a, nath wik God.antaman waa'-waa'ān thamp-a, yaa, niyyan kuchekan kangāna, niyy yipam ke'a ngul-nyaa'an yumpān pam thum niyantam anangan-weya. Niiy ke'wey nath kuchekan kangin niyantakamana, an ke' niyy wanch kuchek pach iyy-iiyaniya. Than niyyang thath-thathiythana niyya ke' wanch way-wayam paththam ngula, puth aak yimanangan wunana, wanch wayangana kuchek pachan ump-umpwuntan. ⁶ Nil wanchangana ke'an kuchekan kangiy-a, aak churchangan-a, yaa, nil maka yangan nungantaman ma'mangkaman umpowa. Nilan kuchek kanganam anman iyy-iiyow, an puth ngul-nyaa'an wun-wunow yangan nilan umpiyana, kuchek pach ngulan iyy-iiyiya. Yaa, nilan kuchek kanganam anman iyy-iiyowa, aak churchangan.

⁷ Puth than pam anangan mee'-wuthanamayn thakan-a, aak churchangan-a, than hat ke' ngoonchayn, nil puth moom pi'an ngamparam alangan God.angan moom yump thanang thampa. Puth than wanch anangana, moom ya'a, puth pam thum thanttaman moom thanttam epa, ⁸ nil puth God.angan ka'athaman pam yumpa, amanamaniya, nil wanch ngul yumpa engk-thaa' kaanch

pam alantaman wich, nil paman wanch alantaman ke'am yump nunang, ya'a. ⁹ Nil pam ka'athaman yump, ngul amanamaniya nilan ngaantam-ngeey nungantakamana nil wanchwey ngul yumpow nungant pam alantant, nil ngurp min yipam iyy-iiyow nungant, a' ma'-aath-aathow nunang thakweya; nil puth piip God.angan wanchana ka'athaman ke'am yump nunang, ya'a, an ngul-ngul yumpana. ¹⁰ Than wanch anangan ke'-paal kuchekan kangayn thanttakaman thanan mee'-wuthanamayn churchangan, than yipam meenathayn than moom ya'a; than pam epa moom thanttama. Than ngaantiyongk God.antam al-alangan thathayn thananga, kuchek kanganaman-a, an ngangk min ngul wunow thant. ¹¹ Puth in thamp ngeeyāna; ngamp woyan Christ.antaman wak-wakanampa, ngamp ke'-paal ma'-aath-aathwump ngamparakaman; than wanchangana pam anangan ma'-aath-aathayn thanang; a' putha, than pamangana wanch anangan ma'-aath-aathayn thanang. ¹² Puth nungkway nil God.angan wanch Eve anan yump nunang kaanch pam Adam alantaman-a, puth aak anpalman ngula than pam yotam inangana wanchantam aak-ngeey-ngeeyantan ngula. Nil God.angan-a, ma'mangkam yump thanang; pam-a, wanch-a, yuk way min yotam anangana.

¹³ Niiyam kan ngaantam-ngeeyāna: an min ngul ey? than wanch anangan mee'-wuthanamayn aak churchangan kuchek ke' kanganaman ey? An ya'a! ¹⁴ A' putha, an min ey? Pam al-alantan yangan ongkan kal-kalayn ey? An ya'a! Ngamp yotam mee'miy an way thanta. ¹⁵ Puth wanch al-alantan ep min thant yangan ongkan kal-kalayn, an ach-umpan thanang. Nil God.angan yangan yimanangan yump thant than yipam yangan otang ke' kal-kalayn ke' pam yimanangan kal-kalantan. Yangan

thanttam wanch al-alantaman-a, ke' yimanangan kalantan pamanganweya. ¹⁶ Yaa, niy wiy anangan nath kaangk wik wiy-wiyam ngaantam-ngeey-ngeeyāna, ngay puth inan thawang niyanta: aak ngampar yimanangan wunana, thonangan ya'a; a' churches yot anangan aak yimanangan wun-wunan thant thampa, thon ya'a.

Niy Inangan Yalmathwuniy May Bread-a, May Wine.an Mungkān Aak Churchangan-a, Niy Minam Iiyān Niyantakamana

¹⁷ Ngay thon inan ngul thawang niyant, ngay wik way ngeeyang niyantam: niy yal-yalmathwuniy churchangan-a, niyan minam ke'am iiy-iyaniy niyantakaman ya'a. Inan min niyant ya'a, niy ke'am ngangk thayanathwuniy niyantakamana yimananganiya, an niy wayathwuniy niyantakamana. ¹⁸ Than wiy al-alangan waa'in ngathar niy kul uwuwaniy niyantakam, a' yaark-yaark iiy-iyaniy, a' putha ngay ngaantam-ngeeyang ngatharakam than nath wik kan-kanam waa'-waa'antan. ¹⁹ Puth kana, niy mak yaark-yaark iiy-iiyāna, nil puth God.angan ngul thathow thanang wee'-wee'anangan kan-kanaman monkanwak-wakantan nunang. ²⁰ Puth niyan yalmathwuniy yipam may breada a' putha may wine.an mungkān-a, niy Jesus Christ.an minam ke'am ngaantam-ngeeyaniy nunang nilan utham way niyantamakana. ²¹ Niy ke' kuupaniy niyantakamanweya, niyiya may lok-lokang thu'-thu'aniya. Wiy al-alangana, may thakan ke'am uw-uwantan, ya'a, a' thanana meech ngul iiy-iyantant; puth wiy al-alangana, may wine thakan yot mungkmungkantan, a' kuchek wayamantan ngul pal-puy iiy-iyantant. ²² Niy ngul may ke' mungkin aawuch niyantamang angman ey? Niy ke'-paal may pi'anan lok-lokang thu'-thu'aniy aak God.antamangan ey? Niy

ngul ke' ngaantam-ngeeyaniy pam wanch may ke'anang anangan thanang ey? Niiy ngul ngul-nyaa' yumpān thanang ey? may ke'ananganwey iiy-iiyythan ey? In waya! Ngay puth wik want-wanttak ngul thaw-thawāng niyantana e? Ngay thaa'-kuumpāng niyang ey? An ya'a, ngay ke' thaa'-kuump-kuumpng niyanga.

²³ Ngay wik Jesus Christ.antaman waa'-waa'ang niyanta, aak want-wanttakan wun-wunow niyantana ngakan mung-k-mungkāna aak churchangan. Aak ananiyangan ngutangana nil pam Judas alangan ma'aman thee'owan Jesus.an pam wayanang al-alantan-a, nil Jesus.angana may breadana maay, ²⁴ a' thankyou thaw piip God.antana. A' anpalaniya nil may breadan kanngul many-many pip-pipa a' thee'-thee' ngul thanta a' thaw ngul thant, ngurp nungantam al-alantana, “May bread inana ke' kemp ngatharam yimanangan ngay ngulan theetathāng ngathamang niyantana. Niiy may inan mung-k-mungkānan-a, niyaniya ngayangan ngaantam-ngeey-ngeeyāna.” ²⁵ May kanan minchathin-a, nilana cup ngulan maay may wine thampana, a' thankyou thaw God.anta, a' thee'-thee' thant ngul, a' thaw thant, “Ayyang, may wine inana ke' chaapar ngatharam yimanangana ngay ngulan theetathāng ngathamang niyant yotamantana niiy yipam ngangk minangam karpam ngul iiy-iiyān God.antang ke' nilaman thaw aak keenkanaman. Niiy inan mung-k-mungkānan-a, niyaniya ngayangan ngaantam-ngeey-ngeeyāna.”

²⁶ Ngay ke'-paal wik inan thaw-thawang niyanta: niiy aak ngeen nathan ngak-a, puth may bread thakan mung-k-mungkānan-a, aak churchangan-a, an meenathan ngampar nil Jesus Christ.angan theetath nungamang way ngamparamakana. Niiy Jesus Christ anman ngaantam-ngeey-ngeeyān nunang nilan utham ngamparana, a'

putha wiyantan wik waa'-waa'ān aak-aakanakaman nil palaman wampowa. ²⁷ Niiy may bread-a, a' may wine thakan mungk-mungkānan-a, aak churchangan-a, niiy minam ngaantam-ngeey-ngeeyān nunang Jesus Christ.an, thaa'-kuump-kuumpān nunang. Than wee'-wee'anangan wayan iyy-iiyantana-a, nath way thakan ngangkangan pi'-pi'antan-a, puth aniya ke' kempa putha chaapar Christ.antamana way-wayathantan nilan theetath nungamangan ngamparanwey. ²⁸ Ngamp ke'-paal ngaantam-ngeey-ngeeyāmp ngamparakamana ngamp nath way iyy-iiyanampa, yaa, ngamp engkāmp nungant ngul God.antan nil ke'-ngul ngaantam-ngeey-ngeeyow way ngamparam anangana a' anpalaniya may breada a' ngakan epa mungkāmp ngula. ²⁹ Puth wee'-wee'anangan mungkayn-a, a' thanana min-minam ke' nath ngaantam-ngeeyiythan Christ.ana utham way ngamparamakan-a, an God.antan ngangk min ke' wunow nungant ya'a, an aak way ngul wampow thantana. ³⁰ Nanpalana niiy wiy anangan weech-weechan niiyangana, kemp min ya'a, a' wiy anangan-a, kanam uthamin. ³¹ Puth ngampaniy-a, ngaantam-ngeey-ngeeyāmp ngamparakamana ngamp nath woyan min wak-wakanamp, nath ya'a a' ngampaniy-a, God.ant wampāmpa nilan ngangk pachathow ngampang, a' anpalaniy-a, nilan wayana ke'-ngul waa'ow ngampanga. ³² Puth wiyiya nil God.angan way kuch-kuchan ngampar, nil yipam ma'-aath-aathow ngampang woyan min aakanakan koyam weentāmp, nil puth ke' yipam kuchow ngampang aak way aakanakan angan wun-wunāmp aak umpuyangaman pam wanch wiy al-alantangana.

³³ Niiyalang, ngurp ngatharam-ang, ngay ke'-paal wik inan thawang niiyant: niiyan yalmathwuniy mayan mungkān-a, niiy kuup-kuupwuna. ³⁴ Niiy wiy anangan

nath thip meech wun-wunin-a, niy ka'athaman may mungkān aawuch niyantamangana a' anpalaniya niy churchangan wampān. Niy puth ngul yangk mo'-mo'ana, a' nil God.antan ngangk way ngul wun-wuna niyanta-mana, an nil ngul wayathow niyangana. Yaa, ngay wampāngan-a, ngay wik wiy thampan ngul waa'-waa'āng niyanta.

12

Nil Ngeen-Wiy Min God.antam Alangan Thay-Thayanathan Ngampang Work Minam Yipam Iiy-Iiyāmp Nungant

¹ Ngurp ngatharam niyalang, ngay kaangk workan waa'āng niyant, nil Ngeen-Wiy Min God.antam alangan work thee'-thee'an ngampar, a' thay-thayanathan ngampang thampa work minam yipam iiy-iyāmp nungant. Ngay kaangk niy mee'miy iiy-iyāna work anan-weya. ² Niy puth kan mee'miya, an niy ka'athamana God.ana ngoongk-ngoongkama. Aak an-aniyangana niy yuk ngeen-wiy anangana ke'-ngoongkam anman thaa'-kuump-kuump thanang, yuk anangan wik ke'aman thaw-thawantan. A' than yuk ngeen-wiy al-alangan ngangk mungk-mungkin niyang. ³ Ngay ke'-paal kaangk niy wik inangan kan-kanam ngaantam-ngeey-ngeeyāna: than wee'-wee'anangan Jesus.an way-wayam paththam waa'-waa'antan nunangan-a, an than Ngeen-Wiy Min God.antaman ngangkangan ke'am pi'-pi'antan nunang, ya'a. A' putha, than wee'-wee'anangan Jesus.an moom thantam waa'-waa'antan nunang-a, an than ep Ngeen-Wiy Min God.antaman ngangkangan pi'-pi'antan nunang.

⁴ Puth nil Ngeen-Wiy Min God.antam thonam alangan work yot wiy-wiyam thakan thee'-thee'an ngampar

thon-thonantana. ⁵⁻⁶ Ngamp work wiy-wiyaman iyy-iyanamp yipam ma'-aath-aathwumpa, puth ngamp God thonamantan work iyy-iyanamp, a' putha nil thonam alangaman ma'-aath-aathan ngampang, a' ngangk thay-thayanathan ngampang.

⁷ Nil Ngeen-Wiy Min God.antam alangan ma'-aath-aathan ngampang yotamana, nil thayanathan ngampang thon-thonana, ngamp yipam ma'-aath-aathwumpa. ⁸ Ngamp pam wanch wiy anangan-a, nil ma'-aath-aathan ngampang ngamp yipam wik God.antaman minam ngaantam-ngeey-ngeeyāmp, a' kuchek minangam koochanathāmp pam wanch wiy al-alantan; ngamp pam wanch wiy anangan-a, nil ma'-aath-aathan ngampang wik nungantaman kuchekangam pi'-pi'āmp a' waa'āmp thakan. ⁹ Ngamp wiy anangan-a, nil ma'-aath-aathan ngampang minaman ngangkangan pi'-pi'āmp nunang; ngamp wiy anangan-a, nil ma'-aath-aathan ngampang miyalathāmp thanang, pam wanch weechanan thanang. ¹⁰ Ngamp wiy anangan-a, nil ma'-aath-aathan ngampang work pi'anana meen-meenthāmp thant; ngamp wiy anangan-a, nil ma'-aath-aathan ngampang wik God.antaman waa'-waa'āmp; ngamp wiy anangan-a, nil ma'-aath-aathan ngampang mee'miy yipam iyy-iyāmp pam al-alantamana than nath wik God.antaman kankanam nath waa'-waa'antana, nath ya'a, nath wik oony way alantaman waa'-waa'antan. Ngamp wiy anangan-a, nil ma'-aath-aathan ngampang ngamp yipam thaw-thawāmpa wik thaa'nganth wiy-wiyam alangan nungantam Ngeen-Wiy Min God.antam alantaman wika; ngamp wiy anangan-a, nil ma'-aath-aathan ngampang wik thaa'nganth wiy-wiyam Ngeen-Wiy Min alantaman koochanathāmp thantana. ¹¹ Work yotam inanganiya, nil Ngeen-Wiy Min God.antam alangan thee'-thee'an

ngampar, nilam thonam alangaman. Nil ngampar thon-thonamantan work wiy-wiyam thee'-thee'an, an nilam mi'-mi'an ngampar.

Ngamp Ke' Kemp Thonam Nungantang Jesus.antang Anman

¹² Nil God.angan mee'-a, kon-a, tha'-a, kemp umyompanam thakana kung-mak ngampang, kemp ngamparamang. Inaniya aak yimanangan wun-wunana: nungkway ngamp pam wanch Christians yot anangan-a, an ngamp ke' kemp thonam nungantang Jesus.antang anman. ¹³ Ngamp wiyaniy-a, Jews; a' ngamp wiyiy-a, Greeks: ngamp wiy anangan-a, slaves; ngamp wiy anangan-a, slaves ya'a. Puth than kootran ngakang kungkin ngampangan-a, an ngamp ke' kemp thonam ngulweenamp nungantang Jesus.antangana. A' nil God.angan Ngeen-Wiy Min nungantaman kuchan ngampar, Ngeen-Wiy thonam anman nungantaman, nil yipam ngangkan-gan wun-wunow ngamparang yotamantangan.

¹⁴ Nil pamangan mee' thonakam ke'am kalana, an ya'a, a' puth kon thonakam ke'am kalana, an ya'a; nil mee'-a, kon-a, ma'-a, tha' thakan kemp umyompanam kal-kalan kemp nungantamangan. ¹⁵ Nil tha'ana nath thawiywey nungantakamana, "Ngaywey inan waya, ngay puth ma' ya'a, nil pam alangan ngayang kaangk ke' natha." An ya'a! Tha' alangan way-way ngaantam-ngeey-ngeeyan. Nil pam ananiya kaangkwey tha' thamp iyy-iiyowa! ¹⁶ A' putha, nil konan nath thawiy nungantakamana, "Ngaywey inan waya, ngay puth mee' ya'a, nil pam alangan ngayang kaangk ke' natha." An ya'a! Nil pam ananiya kaangkwey kon thamp iyy-iiyowa! ¹⁷ Nil pam nath ma'-a, tha'-a, kon ke'anang iyy-iiyiywey-a, mee' thonakaman kal-kaliywey-a, an nil puth want-wanttak wikaniy ngeey-ngeeyowa? An ya'a! A' putha, nil pam nath

ma'-a, tha'-a, kaa' ke'anang iyy-iyyiwey-a, kon thonakaman kal-kaliywey-a, an nil puth want-wanttakan awal nguuth-nguuthowan a? An ya'a! ¹⁸ Nil piip God.angan yump ngampang kemp umyompanam ngamparamana, ma'mangkama ngampan kal-kalanampa, mee'-a, tha'-a, ma'-a, kon thakan kal-kalanamp, a' nil God.angana work thee'-thee' thant il-ilantana. ¹⁹ Nil pamangan nath mee' thonakaman kal-kaliywey-a, nath kon thonakaman kal-kaliywey-a, an nil pam paththaman ke' iyy-iyyiya, an ya'a! ²⁰ Nil puth pam thonamangana kemp nungantamang yot ep kal-kalan, mee'-a, kon-a, ma'-a, tha' thakan, yot anangan kemp nungantang anman, puth niliy-a, pam thonam anman iyy-iyyan, kucham, ko'alam ya'a, pam thonam anman.

²¹ Nil mee'an nath thawiy ma' alantan, "In nint waya! Ngay kaangk ke' nintang ngula." An ya'a! Nil ke' thawiy yimanangan. A' putha nil kuchekana ke' thawiy tha' alantan, "In nint waya! Ngay kaangk ke' nintang!" An ya'a! ²² Ngamp nathwey ngaantam-ngeey-ngeeyimp kemp wiy ngamparamana way thampa, ke' thayan ya'a; an ya'a, than anangan-y-a, an minwey ngampar. ²³ Ngamp nath ngaantam-ngeey-ngeeyanamp ke' kemp wiy anangan ngamparamana ke'am nath ach-umpan ngampanga, ngamp ke'-paal minam pi'-pi'anamp, ngook thakan ngoonch-ngoonchanamp, kemp wiy anangan yipam mupam wun-wunow, puth ngencha, ke' thath-wimpa, ngampan ke'-paal kemp ngamparaman kangkanganamp, ngookangana. ²⁴⁻²⁵ Puth ngamp kaa'wal ma' thakan ke' kangkanganamp, ya'a, ngampan puth ngaantam-ngeeyanamp thanang an ach-umpan thampa ngampanganiya. Puth nil God.angana kemp ngamparam anangan minam yumpa! Kemp wiy anangan ngampar nath ngaantam-ngeeyanamp ke'am nath ach-

umpan ngampang, nath way natha, many thakan-a, an puth nil God.angan ngaantam-ngeey-ngeeyan thanang ke' mina, nil nanpalan thawan ngampar minam pi'-pi'āmp thanang. In aak yimanangan wunan ngampar, ngamp ke' kemp thonam nungantang anman, Jesus.antang ngamp ke'-paal ngangk minangam iyy-iyyāmp ngamparakamana. Ngamp wiy anangan-a, pam wanch pi'an; wiy anangan-a, ya'a, manya; puth nil God.angan pam wanch manya kaangk-ke'anang anangan minam ngaantam-ngeey-ngeeyan thanang. Puth ngampa minam anman pi'-pi'wumpa, ke' yaarkathwumpweya, kulang thakana. ²⁶ Nil thonam ngamparamweya nath ngangk way wun-wuniywey-a, yaa, ngamp yotaman ngangk way wun-wunimpa nungantang thampa. A' putha, than wiy al-alangan nath pam thonam ngamparamwey thaa'-kuump-kuumpiythan nunang-a, an ngamp yotaman karpam anman ngangk min-minam paththam wun-wunimpweya.

²⁷ Yaa, ngampaniy-a, thon-thonamana karpam iyy-iyyanamp Christ.antang, ke' kemp thonam nungantang anman. ²⁸ Nil God.angan work thee'-thee'an ngampar thon-thonantan. Wiy al-alantan-a, nil work pi'an thee'-thee'an; wiy al-alantan-a, nil work chil pi'an thee'-thee'an thant; wiy al-alantan-a, work many thee'-thee'an thant. Wiy anangan-a, nil Jesus.angan kuchan thanang wik nungantaman waa'-waa'ayn, inana work wuut pi'an paththam; wiy al-alangan-a, wik God.antaman koochanathantan, wiy al-alangan-a, thaa'-aath-aathantan thanang — inan, work chil pi'an; a' putha, wiy al-alangan work wiy-wiyam yump-yumpantan; than nath work pi'an meen-meenathantan ngampar, nath miyal-miyalathantan thanang thakana; nath wiy anangan ma'-aath-aathantan thanang; nath moom iyy-iyyantan,

wiy anangan pi'-pi'antan thanang; nath wik thaa'nganth wiy-wiyam Ngeen-Wiy Min God.antam alantaman thaw-thawantan. ²⁹ Ngamp ngul yotamang work thonam anman iyy-iyyanamp ey? An ya'a! Ngamp work wiy-wiyam thak iyy-iyyanampa. Nil God.angan ngampang yotam anangan ke'am kuch wik Jesus.antaman waa'-waa'āmpāna, an ya'a, nil puungk wiy anangan ep kuch thanang. A' putha, nil God.angan ngampar yotam al-alantan work ke'am thee' wikan koochanathāmp, an ya'a, puungk wiy al-alantan epa. Nil yotam al-alantan work ke'am thee' teachersan iyy-iyyayn, an ya'a, puungk wiy al-alantan epa. A' putha, ngamp yotamangana ke' work pi'an meen-meenathimp thant, ya'a, ³⁰ ngamp yotamangana ke' miyal-miyalathimp thanang pam wanch weechanan thanang, ya'a, puungk wiy al-alangan an epa. A' putha, ngamp yotamana wik thaa'nganth wiy-wiyam alangan Ngeen-Wiy Min God.antam alantaman wika ke' thaw-thawimp, ya'a, a' putha ngamp yotamangan wik thaa'nganth nungantaman ke' koochanathimp, ya'a, puungk wiyangan epa. ³¹ Yaa, puth niyaniya, work pi'anakan ngaantam-ngeeyāna, niy yipam wiy anangan minam ma'-aath-aathān thanang.

Puth ngay kan inan waa'-waa'āng niyant niy want-wanttakan min-minam paththam iyy-iyyāna: niyiya ngangk minangam iyy-iyyān thant pam wanchantan, niy kaangk paththam wun-wunān thanta.

13

Ngamp Ngangk Minangam Iyy-Iyyāmp Thant Pam Wanchantan a!

¹ Ngampaniya nath wik ma'mangkaman thaw-thawimp, thaa'nganth thon-thon al-alangana, a' putha

wik thaa'nganth ngaantiyongkantamangana thaw-thawimp thampa. Puth ngamp ke' nath kaangk wun-wunimp pam wanchantan-a, yaa, an ngamp yaan thaw-thawanampa, wikathiy weenāmp ke' yuk bell yimanangan, natha ke' yuk pi'an anangan muutathiy piik-piikantana. Yaa, ngamp kan-kanam paththam kaangk wun-wunāmp thanta! ² Ngampwey nath wik God.antam minaman waa'-waa'imp pam wanchantana. Ngamp nath kuchek min wun-wunimpa, a' yot-yotam anangana thiichimpweya aak earth imanamana, a' puth-a, ma'mangkam nath thiich-thiichimp wik God.antaman. Ngamp nath kan-kanam ngaantam-ngeey-ngeeyimp nil God.angan ngul ma'-aath-aathow ngampang work pi'-pi'anam anangan meen-meenathāmp thanta; wiyiya ngampa yoyk wuut pi'an alantan nath thawimpa puy kech-kech iyyān aak thonaka. Puth ngamp nath kaangk ke'an wun-wunimp pam wanchantan-a, yaa, nil God.angan mina ke' waa'-waa'iy ngampang, ya'a. Yaa, ngamp kan-kanam paththam kaangk wun-wunāmp thanta! ³ Ngamp natha way min ma'mangkam ngamparaman thee'imp pam wanch wiyantana, a' ngampiya nath theetathimp ngamparakaman thumang yipam pench-penchimp. Puth ngampwey kaangk ke'an wun-wunimp pam wanchantan-a, yaa, an puth nil God.angan min ke' waa'-waa'iy ngampang, ya'a.

⁴ Ngamp kaangkan wun-wunāmp pam wanchantan-a, yaa, man kul ngampar erkaman ke' wamp-wampow, ngamp ngangk minangam iyy-iyyāmp thant. Ngampaniya ke' mee' wun-wunāmp thant pam wanch wiyantan ya'a. Ngamp ulp-ulpanangan ke' iyy-iyyāmp thant, putha wik pi'anang ulp-ulpanang ke' thaw-thawāmp ngamparakaman ya'a, ⁵ a' putha ngamp ke' wayamāmp thant, kaa'-thayanan ke' iyy-iyyāmp thantweya. Ngamp

ngamparakaman thonakaman ke' ngaantam-ngeey-ngeeyāmpa, pam wanch wiy anangan thamp ngaantam-ngeey-ngeeyāmp thanang. A' putha, ngampiya thaa' poch-pochaman ke' thaw-thawāmp thantweya, a' putha ngampiya kul kath keenkanaman-a, an ke'-ngul ngaantam-ngeey-ngeeyāmpa. ⁶ Than pam wanchangan wayan yump-yumpayn-a, an ngampaniya ngangk way iiy-iiyāmp thanttamana, ngangk minangaman ya'a. Puth than wik min God.antaman ngeey-ngeeyayn-a, an ngampiy putha ngangk min wun-wunāmp thanttamana. ⁷ Nungkway than-ngampar wayan yump-yumpayn-a, an puth ngampiya kaangk wun-wunāmp paththam thantana, ngamp ke' wantimp thanang anpala way thanan yump-yumpin. A' ngamp ke' ngaantam-ngeey-ngeeyimp ke' than way anman iiy-iiyithana, ya'a. An ngamp kuup-kuupāmp thant, than nath min ngul iiyayna. Than min nath yumpiythanwey-a, nath ya'a, way nath yumpiythanwey-a, an ngampaniya ke'-ngoongkam anman ngangk minangam iiy-iiyāmp thantana.

⁸ Ngampaniya murkanim anman ngangk minangam iiy-iiyāmp pam wanchantan. Aak ingana, Ngeen-Wiy Min God.antam alangan ngampang wiy anangan ma'-aath-aathan wik min God.antaman minam waa'-waa'āmp pam wanchantan, a' wiy anangan nil ma'-aath-aathan wik thaa'nganth wiy-wiyam nungantaman thaw-thawāmpa, a' wiy anangan ma'-aath-aathan thanang kuchek waap minan iiy-iiyayna. Puth aak ngul-ngulana, work ngamparamana minchow ngula, ngampa wik min God.antaman ke'-ngul waa'-waa'āmp thant, ya'a; a' wik thaa'nganth wiy-wiyaman Ngeen-Wiy Min God.antam alantaman ke'-ngul thaw-thawāmp thakana, an ya'-ngula. ⁹ Aak inan yimanangan wun-wunana: ngamp pam wanchangan manyam thonakam thiich-thiichanampa, a'

ngamp wik min God.antaman min-minaman ke'am waa'-waa'anampa, ya' yippaka. ¹⁰ Puth aak ngul-ngulana, nil Jesus.an palaman wampowan-a, nil God.angan yotaman waa'-waa'ow ngampar, a' aak an-aniyangan ngula ngamp wik ma'mangkam thiichāmp ngul, ngamp ke'-ngul wikan thaa'an-aath-aathwumpa.

¹¹ Ngamp puk manyaman iyy-iiyampān-a, ngampaniya ke' puk manyiy yimanangan wikan thaw-thawampa, a' putha ke' puk manyiyang yimanangan ngaantam-ngeey-ngeeyampa. Ngamp yimanang ngulana ke' puk manyiy yimanangan ke'-ngul ngaantam-ngeey-ngeeyanampa, a' thaw-thawanamp thakana, ananiya ya'-ngul. Puth ngamp pam wanch ngul ween-weenampa. ¹² In aak yimanangan wun-wunana: nil piip God.angan yotam inangan mee'miy ngampang, ngangk ngamparaman thakana nil ep thath-thathan ngampang. Puth ngampaniya manyam anman mee'miya. An wuthanang yippak wun-wunan ngampar, an ke' ngamp yuk mirror way alangan thath-thathwunamp kaa'wal ngamparaman, ke'-paal ngampaniya ke' thath-thathimp min-minana. Ngul-ngulana, an ngamp epa engkanang ngul thath-thathāmpa, a' putha wik ma'mangkaman mee'miy ngul ween-weenanamp.

¹³ Yaa, ngamp puth wik inangan ngaantam-ngeey-ngeeyāmpa: piip God anman ngangkangam pi'-pi'āmp nunang; a' ngangk minangam paththam kuup-kuupāmp nungant, nil ngulan kalow ngampang aak nungantamakan a' puth-a, ngamp puy-puyam anman kaangk wun-wunāmp ngamparakaman a' putha piip God.antan. Wik inangan an min paththam ngampar. Puth wik thonam inan pi'an paththamana: ngamp kaangk wun-wunāmp ngamparakamana.

14

Ngamp Thawāmp Nungant Ngeen-Wiy Min God.antam Alantan, Nil Yipam Ngampang Ma'-Aath-Aathow Work Iiyāmp God.antan

¹ Ee'a, an ngamp kan-kanam paththam kaangk wunāmp ngamparakamana, pam wanch yotamant, ke'-ngoongkam anman kaangk wun-wunāmp thanta, ke' eench-eenchāmpweya. A' putha ngamp thaw-thawāmp nungant Ngeen-Wiy Min God.antam alantan, nil yipam ma'-aath-aathow ngampang anmana, ngampiy puth wik God.antaman waa'-waa'āmp thant wiyantana, a' work wiy thampān iyy-iiyāmp nungant. ² Puth than pam wanch wiy anangan wik thaa'nganth wiy-wiyaman Ngeen-Wiy Min God.antam alantaman thaw-thawantanan-a, aniy than God.antan thaw-thawantan, pam wanchantan ya'a, than puth pam wanchangan wik anana ke' mee'miya, ya'a, nilam thonakam God.an epa wik anan mee'miya. Than puth wik anan ma'-mupaman wun-wunana waa'-waa'antan wik nungantam God.antamana, an puth nila Ngeen-Wiy Min God.antam alangan ma'-aath-aathan thanang wik ananganiya thaw-thawayna. ³ Puth nil wee'angana wik God.antaman engkanangan waa'-waa'anana-a, an nil pam wanchantan ep waa'-waa'an. Nil waa'-waa'an thant nil yipam ma'-aath-aathow thanang woyan minan wak-wakayna, a' puth ngangk thay-thayanathow thanang, a' nil yipam ngangk min yump-yumpow thanang thamp. ⁴ A' putha nil wee'an wik thaa'nganth wiy-wiyam Ngeen-Wiy Min God.antam alantaman thaw-thawiyweya-a, an nil nungantakam thonakam ma'-aath-aathanweya, puth than wiy al-alangan ke'am thiich-thiichantan, puth nil wee'anganweya wik God.antaman engk-engkanangan

waa'-waa'iywey-a, an nil ep-paththam pam wanch Christians yotam anangan ma'-aath-aathan thananga.

⁵ Ngay kaangk niyang yotaman wik thaa'nganth wiy-wiyam Ngeen-Wiy God.antam alantaman thaw-thawāna, an min niyant. A' putha ngay kaangk paththam niy yotamangana wik God.antaman engkanang waa'-waa'āna, inana ep min paththam niyant. Nil wee'an-gan wik God.antaman engkanangan waa'-waa'an pam wanchantan-a, an nil pam pi'an mee' God.antangan. Puth nil wee'an wik thaa'nganth wiy-wiyam Ngeen-Wiy God.antam alantaman thaw-thawanan-a, an nil pi'an ya'a. Nil nath wik anangan min-minan koochanathiy pam wanchanta aak churchangan-a, an nil epa pam pi'ana, nil puth ma'-aath-aathan thanangweya than yipam woyan God.antamana minam wak-wakayna. ⁶ Ngurp ngath-aram niyalang, ngay nath wamping niyantwey-a, wik thaa'nganth wiy-wiyam Ngeen-Wiy God.antam alantaman thonakaman thaw-thawing niyantantwey-a, an min niyant ey? An ya'a, niyan ke' ngeey-ngeeyina! an niy kum-kumina! Puth ngay nath wik God.antaman engkanang waa'-waa'ing niyantantwey-a, a' minam thaa'-aath-aathing niyangwey-a, an epa min niyanta, niy yipam wik God.antaman mee'miy wun-wunān a' minam ngaantam-ngeey-ngeeyān nunang thamp.

⁷ In aak yimanangan wun-wunana; nil pamangan nath yuk guitar way-way kee'-kee'athiywey-a, ngampaniya want-wanttak mee'miy wun-wunimpa ngampa aak want-wanttinan path-pathāmpa? Nil min-minan engkanangan kee'athiywey-a, an epa ngampan thiichimpa. ⁸ A' inan thamp: keenkanamana, nil pam moom soldier alan-gana yuk trumpet othamayanan wuu'-wuu'iyā, yipam soldiers yotangan yalmathwiythana kul pek-wunakana. Nil nath way-way itangam wuu'-wuu'iy-a, than soldier-

sangan ke' yalmathwiythan, ya'a! ⁹ An aak yimanan-gan wun-wunan ngampara: ngamp nath wik thaa'n-ganth wiy-wiyam thaw-thawimpwey-a, than pam wanch wiy al-alangan wik want-wanttak ngeey-ngeeyiythana? An ya'a! Ke' ngeey-ngeeyiythan, wik ngamparamana wony-wonyam yam kenyan weent-weentiya. ¹⁰ Aak umyompanaman-a, pam wanch yot anangan aak nath-nathan wun-wuntan aak world ingana, a' wik thaa'n-ganth yot-yotam thanttakaman thaw-thawantan! Than aakan puchanangana an ep wik ngeey-ngeeywuntana. ¹¹ Ngay nath kech iyy-iyingwey-a, aak thon-thonakan-a, ngay wik thanttam aak an puchanantamana, ngay ke' ngeey-ngeeyingweya ya'a, ngay puth mal-waa'ama, ngan aak-kunch ya'a. Thananiya than-than; ngayaniya ngay-ngaya thaa'nganth thona, ngan ke' mee'miy ngant-takam, ya'a. ¹² Niiy nath kaangk nil Ngeen-Wiy Min God.antam alangan ma'-aath-aathow niiyang, work min thee'-thee'ow niiyant. Yaa, niiy thawān nungant ma'-aath-aathow niiyang niiyan yipam pam wanch Christians anangan minam ma'-aath-aathān thananga, niiy yipam karpam minam monkan-wak-wakān nunang God.an.

¹³ Nil wee'-nath wik thaa'nganth wiy-wiyam Ngeen-Wiy Min God.antam alantaman thawiywey-a, an nil mee'-wuth-wuthanamow God.antan ma'-aath-aathow nunang wikan kooch-koochanathow pam wanch wiyantan. ¹⁴ Ngay puth wik thaa'nganth wiy-wiyam mee'-wuthanamang thawing God.antan-a, an ke' nil Ngeen-Wiy Min God.antam alangan wikan thaa'ang wunpan ngatharang puth ngay ke' mee'miy ya'a wik anangan ngay want-wanttakana thaw-thawangan. ¹⁵ Yaa, ngay want-wanttakan mee'-wuthanamānga a' aak thakan path-pathāng a? Wiyiya ngay wik thaa'nganth wiy-wiyam Ngeen-Wiy God.antam alantaman thaw-thawang,

a' aak-path-pathang thakan. Wiyiya, ngay wik engkanang aak-path-pathang, a' mee'-wuth-wuthanamāng thakan, puth kuchekangan ngaantam-ngeey-ngeeyanga ngayan ep-paththam mee'miyaniya wik want-wanttakan ngay thaw-thawangana. ¹⁶ Niiy nath wik thaa'nganth wiy-wiyam Ngeen-Wiy Min God.antam alantaman waa'-waa'in churchangana, God.an yipam thaa'-kuumpkuumpān nunanga. Puth than pam wanch wiyangan nath wikan kum-kumiythanwey-a, an puth than want-wanttake “Ee'an” thawiythan e? An ya'a, “Ee'an” ke' thaw-thawiythan than puth wik anana ke' mee'miyweya. ¹⁷ Niiy nath wik alangan God.an minam thaa'-kuumpkuumpin nunang, thankyou thakan thaw-thawin nungant, puth niiy pam wanch wiy anangan ke' ma'-aath-aathin thanang, ya'a, than puth wik niiyantaman ke' ngeey-ngeeyiythan, ya'a.

¹⁸ Ngay thankyou thawang God.anta, puth anpalan ngayan wik thaa'nganth wiy-wiyam Ngeen-Wiy Min God.antam alantaman ma'-yotaman thaw-thawanga, niiy ep chil-chil thaw-thawaniya. ¹⁹ Puth ngay aak churchangan-a, wik thaa'nganth wiy-wiyam Ngeen-Wiy Min God.antam alantaman kaangk ke' thaw-thawānga. Ngay nath wik yaam thaw-thawing niiyant wik thaa'nganth wiy-wiyaman-a, Ngeen-Wiy Min God.antam alantaman-a, an puth min niiyant ya'a! Ngay nath wik engk-engkanang waa'-waa'ing niiyantwey-a, nungkway wik otangam-a, an epa min niiyantweya, niiy yipam ngaantam-ngeey-ngeeyāna ngay want-wanttakan thaw-thawānga.

²⁰ Ngurp ngatharam-ang, niiy ke' ngaantam-ngeey-ngeeyāna ke' puk manyiyang yimanangan ngaantam-ngeey-ngeeyantan. Niiyiya kuchek waap minangam ngaantam-ngeey-ngeeyāna. A' putha, an niiyant min

paththama niy yipam ngoongk-ngoongkam iyy-iiyān way yumpanakana, putha inan ep niyan minam thiich-thiichāna woyan God.antamana, a' minam ngaantam-ngeey-ngeeyāna. ²¹ Than keenkanaman wik God.antam inangan umpin lat ngench thayanangan:

“Ngaya Goda, moom niyantamana, ngay wik inan thaw-thawanga.

Ngay pam wanch aak thon anpalan ngul kuchāng thant pam wanch ngatharam al-alantan.

Than wik ngatharam ngul waa'-waa'ayn thant, puth thananiya thaa'nganth wiy-wiyam waa'-waa'ayna.

A' than pam wanch ngatharam al-alangana ke' thamp ngeey-ngeeyayn thananga, ya'a, than puth कांग्क ke'a wik ngatharaman ngeey-ngeeyayn.”

Nil God.an wik yimanangan thaw. ²² Puth nil Ngeen-Wiy Min God.antam alangan ngeenak ma'-aath-aathan thanang wiy anangan wik thaa'nganth wiy-wiyam nun-gantaman thawayna? Nil ma'-aath-aathan thanang than yipam pam wanch anangan than God.an ke'aman ngaantam-ngeey-ngeeyantan nunangan-a, than God.an yipam pam pi'an ngaantam-ngeey-ngeeyayn nunang. Puth nil Ngeen-Wiy Min alangan wiy anangan ep ma'-aath-aathan thanang wik God.antaman engk-engkanang waa'-waa'ayn thant Christians al-alantan.

²³ Puth niy nathwey yotam yal-yalmathwin aak churchangan-a, a' wik thaa'nganth wiy-wiyam Ngeen-Wiy Min God.antam alantaman karpaman thaw-thawinwey-a, an wanttaka? Nil pam thon nath ngoonchiyweya Christian ya'wey-a, pam nil nath ngoongk-ngoongkam wik Christ.antamanwey-a, an nil ngaantam-ngeey-ngeeyow ke' niy weenth paththam

a! ²⁴ Puth niy yotam nath wik God.antaman engk-engkanangan waa'-waa'inwey-a, an nil pam alangan ep ngeey-ngeeyow niyanga. Nil ngul ngaantam-ngeey-ngeeyow nungantakaman nilan pam way iyy-iiyana, a' ngul-nyaa' wun-wunow. ²⁵ A' putha, nil ngul ngaantam-ngeey-ngeeyow nungantakamana nil kuchekangan wik wayanang anangan pi'-pi'an; a' anpalaniya, nil pungkang ngul nyiinow a' kaa'walana pek aakakam thuchow; a' nil God.an thaa'-kuump-kuumpow nunang, a' thawow ngul niyantana, “An kan-kanama! Nil God.an ngangk niyantangan wun-wunana!”

Niy Minam Yalmathwun Aak Churchangan

²⁶ Ngurp ngatharam niyalang, ngay inan thaw-thawang niyanta. Niy yalmathwuniy aak churchangan-a, niy ma'-aath-aathwun woyan God.antaman minam wak-wakāna. Nil-niyant thonamangan-a, nath aak-path-pathow; nil thon alangan natha wik God.antaman waa'-waa'ow; nil thon alangana nath waa'ow niyant wik nil God.angan waa' nungant ngangkangana; nil thonang natha wik thaa'nganth wiy-wiyam thaw-thawow Ngeen-Wiy Min God.antam alantaman a' puth nil thon alangan wik anangan nath kooch-koochanathow niyantantweya. ²⁷ Niy yotamangan-a, wik thaa'nganth wiy-wiyam Ngeen-Wiy Min God.antam alantaman ke' thaw-thawāna, pam kuchamang ep nath thaw-thawiy pul, nath ko'alamangweya ep-paththam, puth niy yotamangana ya'a. Niy ma'-ma'ang thaw-thawānweya, a' niy wiy al-alangana wikan koochanathāna. ²⁸ Puth nil pam thonam nan ya' natha nil wikan koochanathiy-a, yaa, an niy wik thaa'nganth wiy-wiyam Ngeen-Wiy Min God.antam alantaman ke' thaw-thawāna aak churchangan, niy popam nyiin-nyiinān, a' God.antan

ngangkangam thonakam thaw-thawān nungant.
²⁹ Than pam kuchamanga, nath ko'alamangweya, wik God.antaman engk-engkanang waa'-waa'ayn niyantana, a' niy wiyangan-a, wik ngeey-ngeeyān thanang, a' ngaantam-ngeey-ngeeyān thanang than nath wik minan thaw-thawantan, nath ya'a. ³⁰ Nil God.angan nath wik waa'-waa'ow pam thonam alantan nil niyant yipam waa'-waa'owwey-a, nil mak waa'-waa'ow niyanta. Nil wee'ang nathan ka'athaman wik waa'-waa'an-a, an nil popam ngul nyiinow, nil pam thon alangan yipam wikan waa'ow niyant nil God.angan want-wanttakan waa' nungant.
³¹ An min niyant niy ma'-ma'angan wik God.antaman waa'-waa'ān, niy yotamangan yipam wik min anangan kuchekangan pi'-pi'āna, a' ngangk thayanam iyy-iiyāna. ³²⁻³³ Nil God.angan kaangk ke' niy wik thaa' karpaman thaw-thawāna aak churchangana, ya'a. Pam thonam anman thaw-thawow a' nil wik minchathowan-a, pam alangana, yaa, an ep thon ngul thawowa, an yimanangan ep mina. Nil pam wee'angan kaangk waa'ow wik God.antaman niyantana-a, nil ngaantam-ngeey-ngeeyow nungamang aak nungant ngulan wampow wik thawanakan-a, an ep nil thawowa a' nil ngaantam-ngeey-ngeeyow thampa nil wikan ngul-ngulan wantowana.

³⁴ A' ngay inan thawang niyant: aak ngampar yimanangan wunan aak churchesangan aak nath-nathana: wanch anangan-a, popam nyiin-nyiinayna. Than wik ke' thaw-thawayna, ya'a. Than puth moom ke' iyy-iiyayn, puth wik lat ngench thayanangan yimanangan waa'-waa'ana. ³⁵ Than nath kaangk wikakan engkaynwey-a, yaa, than pam thum thanttam al-alantan engkayn thanta, aawuch thanttamang, aak churchangana an ya'a. Puth than aak churchangan wik ke' thaw-thawayna, inana way-wayam paththama!

³⁶ Niiy nath kaangk ke'a wik ngatharam nanangan ngeey-ngeeyāna. Ngul an wik min God.antamana ka'athaman niiyant wamp ey? An nath niiyantakam thonakam wamp ey? An ya'a! ³⁷ Yaa, nil wee'ang nath ngaantam-ngeey-ngeeyow nungamang ke' nil God.angan kuch nunang wik nungantaman waa'-waa'ow-a, work thakan iyy-iiyow nungantan-a, an nil wik ngatharam anangan ngayan ump-umpang niiyant-an-a, ngaantam-ngeey-ngeeyow thanang an kan-kanam wik God.antam thampa. ³⁸ Nil ya'wey-a, yaa, an ngamp ke' ngaantam-ngeey-ngeeyāmp nunang ke' nil God.angan kuch nunang, an ya'a.

³⁹ Ngurp ngatharam niiyalang, niiy ngangk minangam wik God.antaman puy-puyam waa'-waa'ān wiyantan, wik engk-engkanang waa'-waa'ān thantana. A' than wiy anangan nath kaangk wik thaa'nganth wiy-wiyam Ngeen-Wiy Min God.antam alantaman thaw-thawayn-a, niiy ke' wayathān thananga, mak thaw-thawayna, ⁴⁰ puth niiy ma'-ma'angana thaw-thawāna, minam anman ma'-aathwuna.

15

Nil Christ.an Mulaman Koyaman Ek

¹ Ngurp ngatharam niiyalang, puth inan ngula, ngay kaangk wik min Jesus Christ.antaman putham ngul waa'āng niiyantweya, wik anangan ngay niiyant ka'athaman waa'-waa'angana puth niiyaniya kan-kanam ngul wik min anangan ngangkangam pi'-pi'aniya a' Jesus anman ngangk thayanam ngul monkan-wak-wakaniy nunanga. ² Niiy wik min God.antaman kanaman ngangkangaman pi'-pi'an-a, nilan kaa'-piichanath niiyang way niiyantam anpalana, a' nil minam anman pi'-pi'an niiyang. Puth niiyan puy-puyaman ngangkangam

anman pi'-pi'āna wik nungantam anangana. Nath ya'wey-a, niy nath ka'athaman min-min ke'am ngangkangan pi'-pi'an nunang God.ana ya'a, an yaan thonakam, puth God.angan ke' kaa'-piichanathow niyanga.

³ Ngayan wik min paththaman waa'-waa'ang niyantana than wiyangan ka'athaman thaa'-aath-aathin ngayang, wik inana: nil Christ.an way ngamparamakan utham, ke' than pamangan aak keenkan lat ngench thayanangan umpin waa'in nunangan nil ngulan uthamow way ngamparamakana. ⁴ Nil Christ.an kanaman utham-a, thanan kaampin nunang, puth ma'-ko'alam thonakam awarangan wun, a' nil God.angan koyam mulaman ekath nunang ngula ke' wik anman than pamangan aak keenkan lat ngench thayanangan umpina waa'in nunangana. ⁵ Ngul-ngulana, nil Jesus.an palam ngul wamp Peter.ant a' anpalana ngurp nungantam wiy al-alantan thant ngul wampa. ⁶ A' ngul anpalaniya, nilana ngurp nungantam yotam al-alantan ngul wamp, than karpaman yalmathwin, five hundred al-alantana wampa. Than wiy anangana man-yetham yippak iyy-iyyin puth wiy anangan epa kanaman uth-uthamin. ⁷ Ngul anpalaniya, nil James.ant ngul wamp a' thant wiy al-alantan ngul wamp, nilaman kuch thanang wik nungantaman waa'-waa'ayna.

⁸ A' putha, aak ngul-ngulana, nil heavenakan koyam kanan mat-a, nil ngathar thamp ngul wamp. ⁹ Ngay ka'athamana, way paththam iyy-iyyangan Christians wiy al-alantan, puth ngayan pam pi'an ke'am iyy-iyyangan, ya'a, than pam wiyangan wik God.antaman waa'-waa'antan-a, an than ep-paththam pi'an iyy-iyyantan, puth ngayaniy-a, ep ya'a. ¹⁰ Puth nil God.an ngangk min paththam iyy-iyy ngathar a' ma'-aath-aathanya, a' mi'

ngayang yipam wik min nungantaman waa'-waa'āng thant wiyantan. Nilan aak-ya'ang ke'am ma'-aath-aathanya ya'a, puth ngay work pi'an paththam iyy-iiyanga. Ngay puth ep work tha'iy paththam iyy-iiyanga, puth than wiy anangan ya'a. Puth ngayiya kemp thayan ya'a, work inaniy yump-yumpānga, puth nil God.an ngangk minangam iyy-iiyan ngatha, nil ma'-yotaman ma'-aath-aathan ngayang work inan yumpāngana. ¹¹ Niiy nath wik min God.antaman kan ngeey-ngeeyan ngayan wik waa'-waa'angan niiyantana, nath wiyantam thamp niiy kan wik minan ngeey-ngeeyan, an kana, ngan yotamangan wik God.antam anman waa'-waa'ananiy, a' niiyan kan wikan ngangkangam ngul pi'-pi'aniy.

Nil God.angan Pam Wanch Ngampang Ngul Mulaman Ekathowa

¹² Puth wik inan ngeeyāna: nganan puth kan wik waa'-waa'an niiyant, nil God.angan nunang Christ.an mulaman ekathan, puth niiy wiy anangan thaw-thawaniya nil ke' God.angan pam wanch mulaman ke' ekathiya. An-ngul niiy ngeenak wik yimanangan thaw-thawaniya? ¹³ Niiy yimanangan thamp ngaantam-ngeeyinwey-a, yaa, niiy inana yimanangan thamp yaaka' ngaantam-ngeeyina, nil ke' God.angan Christ mulaman ke'am ekathana. ¹⁴ An nil Christ.an mulaman ke' nath ekiywey-a, puth nganan ngeenak wikan waa'-waa'in niiyantana, puth niiyan ngeenak wikan ngangkangan pi'-pi'aniya? ¹⁵ Nil nath ke' ekiwey-a, nganan wik God.antamana aak-ya'ang waa'-waa'in nil mulaman ekathana! An ya'a! Ngan ke'a wik aak-ya'angan waa'-waa'ina! Nil piip God.angan kan-kanam paththam mulaman ekath nunang! Puth niiy wiy anangan thaw-thawaniya nil ke' God.angan

pam wanch mulaman ke' ekathiy. Pam wanch mulaman ke'an ekathiy-an-a, Christ.ana yimanangan ke' ekathiy. Puth nganan ke'am wik uuy-uuyamanan niyantana, ya'a, nil Christ.an kan-kanam paththam mulaman eka! ¹⁶ A' nil God.angan pam wanch mulaman-a, kan-kanam ekathow thanang thampa! ¹⁷ Nil Christ nath ke'an mulaman ekiywey-a, ngamp puth ngeenak ngangkangaman pi'-pi'impan e? Ayyang, ngul niyang wee'anga kaa'-piichanathiy way niyantam anpalaniy a? ¹⁸ Puth than Christians wiy anangan ngul wanttak a? Than kanaman uth-uthamina? Thanan God.antangan ke' wuniythan ey? ¹⁹ Ngamp Christians il-ilangana ngangk Christ.ant thee'ampa, a' ngamp kan ngangkangaman pi'-pi'anamp nil ngul ma'-aath-aathow ngampanga aak ingan earthangan wun-wunanampana, ngulana nil kalow ngampang ngamp yipam aak nungantang wun-wunāmp aak umpuyama. Wik inan nath kan-kanam ya'wey-a, ngamp an aak umpuyaman nungantangan wunāmp-an-a, yaa, than pam wanch wiy anangan ngangk way wun-wunayn ngamparamana! Puth an ya'a!

²⁰ Nil God.angan Christ.an kan-kanam ekath nunang mulamana! Nil nunangana ka'athaman mulaman ekathana, puth anpalana, nil wiy thampana ngul ekathow thanang mulamana. ²¹⁻²² Aak keenkanamana, nil pam thonamang Adam alangan way yump, a' puth nanpalan pam wanch yotaman way-wayam paththam ngul weenin, a' puth pam wanch yotaman uth-uthamin ngul, puth ngamp yotamangan way yump-yumpanamp. Puth ngul-ngulana, nil God.angan pam thonaman ep-paththam mulaman ekathan, Christ.ana, puth nanpalana, nil God.angan mulaman ekathow thanang pam wanch anangan than nunangan monkan-wak-wakantan. ²³ Puth nilam God.ang aak anan mi' nungant Christ.antan

mulaman ekathow nunang, a' putha aak anan thampa mi' ngampar pam wanchantan mulaman ekathow ngampang ngulana. Ka'athamana, nil Christ.an mulaman ekathana, a' anpalana, nil Christ palaman ngulan wampow-a, nilana ngampang ngul mulaman ekathow anangana ngamp ngangkangan pi'-pi'anamp nunangana. ²⁴ A' anpalaniya, aak inan kan-ngulan minchowa. Aak an-anayangana, nil Christ.angan thanang moom pi'-pi'an yotam aak imanamana way-wayathow thananga, a' wuut manth-thayan anangan puth oony way anangan thakana way-wayathow thanang thampa than ngangk-wayangaman kal-kalin nunang a' thaamp-thaampin nunang thakana, nil yotam anangana way-wayathow thanang. Ngul anpalaniya, nil pam wanch nungantam anangan ma' nungantangan iyy-iyyinana kalow thanang God.ant, a' nil God.antan ngul ma'am thee'owa, anpalana nil God.angan yotaman ma' nungantang ngul pi'-pi'ow thanang. ²⁵ Nil Christ.an moom pi'an paththam ngul iyy-iyyow ngampara, aak-aakanakaman nil God.angan wayathow thanang than Christ.an ngangk-wayangaman kal-kalin nunang. An ke' nil Christ.angan tha'ang maakow thanang, thananiy ke'-ngul pam pi'-pi'anaman iyy-iyyayn. ²⁶ A' anpalaniya, pam wanch yotaman ke'-ngul uth-uthamāmp. Aak anana nil God.angan wayathow ngula, ngamp ke' yipam mulan wun-wunāmp, an ya'-ngula. ²⁷ Puth lat ngench thayanangan waa'-waa'ana, “Nil God.an wik yimanangan thawa: nil Christ.an moom pi'an way min ma'mangkam al-alantana a' putha pam wanch ma'mangkam al-alantana, nilam yot inangan ma' nungantang pi'-pi'an.” Puth nil God thampan ma' Christ.antangan ke'am iyy-iyyan ya'a! Nil puth Christ.ana moom pi'an God.antamana ya'a, puth nil God.angan moom pi'an paththaman yump nunanga.

²⁸ Nil piip God.angan way min ma'mangkaman ma' Christ.antangan kanan thee'owan-a, a'aak an-aniyangan-a, nil Christ.angana, nhengk God.antam alangan ngulana, ma' God.antangan wantow nungamangana, anpalana nil God.an kan-kanam pi'an paththam ngul iiy-iiyowa, a' ngampang yotaman ma' nungantang ngulan pi'-pi'ow.

²⁹ Ngamp kan pam wanch anangan ngaantam-ngeey-ngeeyāmp thanang, kanaman uth-uthamin, puth ke'aman kootra ngakangan kuungk-kuungkin thanang wiyangan. Puth niy wiy nanangan ep kan thawan thant wiyantan kootran kuungkayn niyangan thant al-alantan pam wanch kampana putha ngurp niyantamakan thampa, than mulan kanaman wun-wuninweya! Puth niy wiy anangan thawaniy nil ke' God.angan pam wanch mulaman ke' ekathiy. Wik inangan kan-kanamanwey-a, niyan ngeenak ngul thaw-thawaniy thant wiyantan ngula kootran ngakangan kuungkayn niyangan thant mul al-alantan thonakam a? ³⁰ Putha ngayan ngeenak ngul iiy-iiyang wik God.antam anman waa'-waa'āng wiyantan e? Puth than amanamana than wiyangan kaangk mulathayn ngayangweya! ³¹ Ngay inan kan-kanam wik waa'-waa'ang niyanta: kinch thon-thonangana, than ke' pam wanchangan ngayang mulathaynweya! Ngay niyant inan waa'-waa'anga, ngurp ngatharam niyalang, ngayan putha ngangk min iiy-iiyang niyantamana, puth ngamp yotamangan Christ Jesus Lord ngamparaman ngangkangaman pi'-pi'anamp nunangana. ³² Aak Ephesus anganiya, than pam wanchangan way pi'an paththam yump-yumpin ngathar. Thanan ke' minh kulliy yimanangan ween-weenin ngathara! Puth wik inan kan-kanam natha ya'weya nil God.angan pam wanchan mulaman ekathow thanangan-a, puth ngayan work pi'an God.antaman ngeenak iiy-iiyang e? Ngampam puth

ke' pam wanch wiy ananganweya yimanangan mak iyy-iiyāmpa, ngamparakaman thonakam ngaantam-ngeey-ngeeyāmp, “May minh-a, a' ngak pi'an thakan mungkmungkāmpa, puth ngampan natha ngaa'thamana uth-uthamāmp ngula.” An ya'a, ngamp yimanangana ke' ngaantam-ngeey-ngeeyāmpa. Nil God.angan kan-kanam paththam mulaman ngul ekathow ngampang!

³³ Pam wanch way al-alangan nath muukamathiythan niyang, a' wayathiythan niyang thampa. Niiy ke' ngeeyān thanang a! Puth niywey thanttang nenchaninan-a, yaa, thanan putha woyan minamana woyan wayak ngul weentathayn niyangwey. ³⁴ Niiy kuchek minangam kan-ngul iyy-iiyāna a' niiy wayan ke'-ngul yump-yumpān, kan wantāna! Ngay inan thaw-thawang niyanta: niiy wiy il-ilangan min-minam ke'am God.an ngaantam-ngeey-ngeeyaniy nunang nil min-minam paththama a' putha pi'an paththama. Ngay wik inan thaw-thawang niyantana, ngay yipam kootra nyaa' yumpāng niyangweya.

Nil God.ang Ngampang Mulaman Ngulan Ekathow-a, An Ngampan Kemp Wiy-Wiyam Ngul Kal-Kalāmp

³⁵ Niiy nath wiyangan ngaantam-ngeey-ngeeyaniy, “An puth nil God.angan want-wanttak pam wanch mulaman ek-ekathow thanang e? Puth than kemp nyiinganaman ngul want-wanttak kal-kalayn e?” ³⁶ An niiy way-way ngaantam-ngeey-ngeeyaniya! Wik inan ngeeyāna: nil pamangan may kaanch ke'an aakangan kaamp-kaampiy-a, an may kaanchan ke' em-emiy ya'a. Puth nil may kaanchan aakang kanan kaampan-a, may kaanchan thaa' ikan ngul a' yiikanan kan-ngul pentan pe'anana kathaman ngul. ³⁷ Nil pam alangana may kaanch anman thonakam kaamp-kaampan, nath may kaanch wheatantam, nath

may kaanch wiy-wiyam kaampan, nilan yuk yiikan yotamana ke'am kaamp-kaampan, ya'a, kangka, penth yiikan thampana ya'a. ³⁸ May kaanch wheat alantamana, may wheat anman pent-pentayna. Puth may kaanch wiy-wiyam al-alantaman yuk yiikan yot wiy-wiyam pent-pentayn. Nil God.angan may kaanch wiy-wiyam yot thaa'-wantanam yump-yump a' nilan pe'an a' kangk-a, puth-a, yukang angan thakan wiy-wiyam yump-yump thananga.

³⁹ Puth pam wanchangana a' putha minh wiy-wiyamang thakan ngamp kemp karp ya'a, ngamp pam wanchangan-a, kemp ngamparakam kal-kalanamp a' puth than minhangana kemp wiy-wiyam anangan kal-kalantan thanttakama, minh panchangan kemp wiy-wiyaman kal-kalantan, a' puth nga'anganiya, kemp thanthan wiy-wiyam kal-kalantan. ⁴⁰ Than ngaantiyongk aak in kenyan wun-wuntan-a, an thanana kemp wiy-wiyam kal-kalantan, ke' pam wanchangan kalanamp yimanangan ya'a, aak earth inman wun-wunanampan ya'a. Than ngaantiyongk ananganweya, an than min ach-umpanaman iyy-iiyantana, than-thana, a' puth ngampaniy-a, pam wanch inangana, ngamp thampana wiy-wiyam min paththam iyy-iiyanampa. ⁴¹ Than inangana, kinch-a, kep-a, putha thunp anangana yotam ananganiya min ach-umpanam wun-wuntan. Puth than yotamana wiy-wiyam wun-wuntan. Kinchaniya, an nil-nil; nganth pi'an paththam park-parkan aak kinchangana; kepaniy-a, an nil-nilweya, nganth pi'an paththam ke'am parkan ke' kinchana; nganth many pi'-pi'an aak ngutangana; thunp anangan-a, an thanthan, nganth many pi'-pi'antan yuwang in kenyan aak ngutangana. Puth thunp anangan-a, than wiy-wiyam thak wun-wuntana. Puth yotam anangana mina ach-umpanam wun-wuntan.

⁴² Aak anan yimanangan wun-wunow nil God.angan pam wanch mulam ngul ek-ekathow thanang. Ngampam uth-uthamāmp, a' thanan kaamp-kaampayn ngampang a' kemp ngamp inangan kal-kalanampa, an kathamayn ngul aak awarangan. Puth nil God.angana ngulan mulaman ekathow ngampanganiy-a, ngampam kemp wiy-wiyam ngul kal-kalāmp thanang, ke'-ngulan kathamayn, an anman aak umpuyangan ngul pi'-pi'āmp. ⁴³ Than ngampang aakangan kaampayn ngulanwey-a, kemp ngamparam anangana, way-wayam paththam kath ngul weenayna, ma' punth yuup ke'anang ngul wun-wunāmp. Nil God.ang kan-ngulana ekathow ngampang mulaman-a, kemp ngamparam nyiinganamana, an min-minama a' thayan paththam ngul kal-kalāmpa. ⁴⁴ Ngamp uthamāmp-an-a, than wiyangan kemp ngamparaman aakang kaamp-kaampayn, kemp inangan ngampam kal-kalanamp aak earthang ingman yippak wun-wunanampana. Nil puth God.ang ngampang mulam ngulan ekathowan-a, ngampaniya, kemp wiy-wiyam ngul kal-kalāmp, ke'-ngul uth-uthamāmp, ya'-ngula, puth man-yetham anman aak umpuyam ngul wun-wunāmp. Ngamp kemp inangan kal-kalanamp aak earthang ingana, an waya, puth aak ing kenyan heavenangana ngamp kemp wiy-wiyam ngul kal-kalāmp. ⁴⁵ Wik inan kan-kanama than puth wik inangan aak keenkan lat ngench thayanangan umpina, “Nil God.angan ka'athaman pam Adam.an yumpana, man-yethaman iyy-iiyowa.” Ngul anpalaniya, nil God.angan pam Adam thonangana ngul kuchan, aniy-a, Jesus anana, than yipam pam wanch wee'-wee'anangan ngangangan pi'-pi'ayn nunangan-a, an than aak nungantang angan ngul wun-wunayn aak umpuyama. ⁴⁶ Ngamp ka'athamaniya aak earthang ingman wun-wunanamp, kemp inman ngampaman kal-

kalanampa, amanamaniy-a, ngamp uth-uthamāmp-an-a, an aak God.antang ngul wun-wunāmp, a' kemp wiy-wiyam ngul kal-kalāmp. Ngamp ka'athamana aak God.antang ke'am wun-wunamp, ya'a. ⁴⁷ Nil God.angana pam anan yumpan Adam ka'athamana, chil aakam inpalana yumpanwey, puth nil Adam thonangan anana ngul-ngulan wamp-a, pam ananiy nampa Christa, aniy-a, aak inpal kenyan uka. ⁴⁸⁻⁴⁹ Ngamp yotam inangana Adam alantaman wamp-wampampa, pam anman nil God.angan chil inpalan aakaman yumpana. Ngamp yotamangana kemp kal-kalanamp ke' nilaman kal-kal, puth ngamp yotamangana way anman yump-yumpanamp ke' nilam anman wayan yumpa. Nil God.angan ep Adam.an aakaman yump nunang, puth nil Christ.aniy-a, aak inpal kenyan uk. Puth puungk wiy anangan ngampa Christ.antan ngangk thee'-thee'amp-an-a, ngampaniya kemp wiy-wiyam ngul kal-kalāmp, ke' nil Christ.angan kemp nyiinganam kal nil mulam kanaman ek.

⁵⁰ Niiyalang ngurp ngatharam-ang, ngay wik inan waa'āng niiyant: ngamp kemp inangan pi'-pi'anamp-a, an aak earth iikanakaman thonakama. Ngamp kaan-cha putha chaapar thakan kempangan kal-kalanamp-a, an than aak in kenyan aak God.antamangan ke' wun-wuniythan aak anman nilaman pi'-pi'an, wun-wunan thakana. Way min aak nungantamangan anman aak umpuyam wun-wunayn, ke'an kath-kathamiythan, ya'a. Yuk way min ngeen nathan kathan wun-wuniythan-a, an aak God.antamangan ke' wun-wuniythana ya'a.

⁵¹ Wik inan ngeey-ngeeyāna, ngay wik inan waa'-waa'āng niiyanta, nil God.angan wik nungantakaman pi'-pi' thenchanamana. Ngamp yotaman ke' uthamāmpa, puth nilana ngampang yotamaniya kemp wiy-wiyam ngul yumpow ngampanga. ⁵² Aak earth inan minchow-

a, nil ngaantiyongkangan yuk trumpet wuu'-wuu'ow, ngul anpalana nil God.angan yaam ke'anam wiy-wiyaman yump-yumpow ngampang, ke' ngamp mee' erkaman wuthanamanamp yimanangana! Aak an-aniyangana, ngamp trumpetan ngeey-ngeeyāmp-an-a, nil God.angan pam wanch anangan mulaman ek-ekathow thanang a' than aak umpuyam nungantang ngul wun-wunayna, a' putha nil God.angan kemp wiy-wiyam ngul yump-yumpow ngampang thampa ngamp man-yethaman iiy-iiyanampana. ⁵³ Inan aak kan-kanam yimanangan wun-wunowa, ngampan yipama ke'-ngul kemp inan kal-kalāmp, ngamp uthamāmpana a' kathamāmp ngulana puth ngampaniya kemp wiy-wiyam ngul kal-kalāmp, ke'-ngulan uth-uthamāmp puth-a, ke'-ngulan kathamāmpa. ⁵⁴ Aak inan wampowan-a, wik anangan kan-kanam ngul wampowa, than lat ngench thayanangan aak keenkanaman umpin, wik inanganiya:

“Ngamp pam wanch inangan ke'-ngulan uth-uthamāmp, puth man-yetham anman iiy-iiyāmp.

Ngamp pam wanch yotaman ke'-ngul uth-uthamāmp, ya'a,

aak anan ngamp mulan wun-wunanampan-a, an ya'-ya'am ngula,

an kan-ngul minchow, nil God.angan anana wayathow, nil thayan paththama!”

⁵⁵ “Puth ngampaniya ke'-ngul winyinyang mo'-mo'āmp mulan wun-wunāmpana,

puth inan kan-kanam nil God.ang anangan mulaman ek-ekathow thanang kanaman uth-uthamin,

a' puth pam wanch ke'-ngulan mul wun-wunayn.”

⁵⁶ Than pam wanch aak nathpalman uth-uthamin, puth thanan way yump-yumpin. Than ma'mangkamangan wik thayan God.antaman ya' pip-pipin, wik thayan

anangan nil God.angan Moses.antan thee'. Ngamp wik thayan inangan ngaantam-ngeey-ngeeyanampan-a, ngampan puth kan-ngul ngaantam-ngeeyanamp ngamp way paththaman iyy-iiyanamp. ⁵⁷ Puth ngampiya thankyou thaw-thawāmp nungant God.antan, nil puth Jesus.an kuchana nil yipam way ngamparam anpalan kaa'-piichanathow ngampangana a' ngampan yipam nungantang angman ngul wun-wunāmp aak umpuyamana.

⁵⁸ Ngurp ngatharam niyalang, ngay inan thaw-thawāng niyant: niyy Christ anman thayanam monkan-wak-wakān nunanga, niyy ke' mel enchān woyan thonak ngulana. Niiy murkanim anman work iyy-iiyān moom ngamparamakana, niyy workan ke' wantānweya. Niiy work ngeen nathan iyy-iiyaniy nungantan-a, an niyaniy-a, aak-ya'ang ke' work iyy-iiyina, ya'a, work inan puth nil thee' ngampar, ke' wantimpa. A' nil God.an ngangk minangam paththam iyy-iiyow ngampar.

16

Niiyan Wukal Christians Wiy Al-Alantan Thee'ān

¹ Ngay in-ngulan waa'āng niyantana wukal anpalan niiyan yalmathaniya Christians wiy al-alantan aak Jerusalem.angan wun-wuntan wukal ke'ananganweya. Ngay kan waa'ang thant pam wanch al-alantan aak Galatia.angan wun-wuntan, wukal anangan want-wanttakan yal-yalmathayna, puth wik inman ngay niyant ngul waa'-waa'ānga. ² Aak Sunday thon-thonangana, niyy thon-thonamangana wukal wiy wunp-wunpān pokkapanga. Niiy al-alangan wukal pi'-pi'anān uw-uwaniiy-a, wukal pi'-pi'anam wunp-wunpāna. Niiy al-alangan wukal manyan uw-uwaniiy-a, wukal many-many wunp-wunpānweya. Niiy wukalan nangman pi'-pi'ān,

keenk mak wun-wunow, ma'meym yipam wun-wunowa ngay ngulan wampāng niyantana. ³ Niiy pam mininiy ma'-thayanan mi'ān thananga, yipam wukalan aak Jerusalem.akan kal-kalayna. Ngay wampāngan-a, ngay ngul lat umpāng thant pam al-alantan kalayn ngul aak Jerusalem.akana, than yipam pam wanch aak angan wun-wuntanan-a, than yipam mee'miy ngul iyy-iiyayn than wee'-wee'anangan kal-kalaynana. ⁴ An nath minwey ngathar-a, ngay thampan iyy-iiyāng thanttangana.

Ngay Puy Ngul Iiyāng Niiyang Yipam Thathānga

⁵ Ngay aak Macedonia wakan iyy-iiyānga. Ngay aak Macedonia anpalan iyy-iiyāngan-a, ngay wampāng ngul niyant nangana, ⁶ a' ngay nath yaan nangman wun-wunāng niyantangana, nath aak kucharangan nangman wun-wunānga. A' ngul anpalaniya, niiy ngayangan ngul ma'-aath-aathān, ngay yipam aak thonak ngul iiyāng aak wanttin nathanweya. ⁷ Ngayan kaangk ke'a niyangan erkaman want-wantānga, ngay kaangk yaam wun-wunāng niyantanganweya. Puth nil nath Lord.angana kaangkwey ngay niyantangan yaaman wun-wunāng-a, yaa, an ep-paththam ngayan yaaman wun-wunāng niyantangana. ⁸ Puth ngayan aak Ephesus.angan yip-pak wunāng aak-aanakamana may pi'an Pentecost.an wampowa. ⁹ Puth than pam wanch il-ilangan aak inan wun-wuntan kaangk wik min God.antaman ngeey-ngeeyayna. An min paththam ngathara, ngay yipam wik minan waa'-waa'āng thanta than pam wanch yotamang kan-ngul yipam wikan ngangkangam pi'-pi'ayna. Puth than pam wanch yot wiy anangan thampa kaangk ke'an wik minan ngeey-ngeeyayn nganttamanweya, than thaamp-thaampantan ngananga.

¹⁰ Nil Timothy.an wampow niiyantanwey-a, niiyana ngangk minangam pi'-pi'ān nunangweya, a' ma'-aath-aathān nunangweya, nil yipam ngangk min ngeechanowa, nil ke' aak nungantamang yimanangan wun-wunowa, nilan yipam ke' winynyang mo'-mo'owa puth nilan work Lord ngamparamant iyy-iiyana, ke' ngayam yimanangan. ¹¹ Niiywey ke' ngaantam-ngeey-ngeeyān nunangana ke' nil pam waya, work minaman ke'am iyy-iiyana, ya'a, niiyiya minam iyy-iiyān nungant a' ma'-aath-aathān nunang nilan yipam ngangk minangam palaman wampowa ngatharana. Puth ngay aak thath-thathāng nunganta a' puth-a, wiy al-alantan thamp.

¹² A' putha, ngay ngurp ngamparam Apollos.an waa'āng niiyant. Ngay ya'angam thaw-thawang nungant, nil thanttang wiy al-alantangan iyyow yipam thathow niiyang aak Corinth.angan wun-wunaniya, puth nilan kaangk ke' iyyowa, nil ngul iyyow niiyant aak minan wunow nungantanweya.

Niiy Wik Min Inangan Ngeey-Ngeeyāna

¹³ Niiy in ngeeyāna: wiyangan ke' thaach-thaachayn niiyang way yumpanakana. Niiy Christ anman monkan-wak-wakān nunang, niiy ke' eench-eechān nungantama, niiyiya ngangk thayanam monkan-wak-wakān nunang.

¹⁴ Niiy ngeen nathwey yump-yumpinwey-a, yaa, niiyan puth anman ngangk minangam kaangk wun-wunān thant wiyantanweya.

¹⁵ Niiy puth mee'miya, than Stephanasa a' puth-a, kampan nungantam wee'anangana Christ.an monkan-wak-wakin nunang ka'athamana aak Greece.angan, a' thanan work pi'an iyy-iiyin, Christians wiy anangan minam paththam ma'-aath-aathin thanang. ¹⁶ Ngay kaangk niiy wik thanttamana ngeey-ngeeyāna puth pam wanch wiy al-alantaman than thamp workan iyy-iiyant

God.antana. Minaman ngaantam-ngeeyān thanang a' than wik ngeenanwey thaw-thawayn niiyantana, niyan wik ngeey-ngeeyān thanntamana.

¹⁷ Than inangana, Stephanas-a, a' Fortunatus-a, a' putha Achaicus in wampina, a' ngangk min paththam ngul wun-wun ngathar. Ngay iingki wun-wunang niyantana, puth than inangan wampina-a, ngayan ngangk min paththam ngul wunanga. ¹⁸ Thanan ngayang kangul ngangk thayanathin, ke' than niyang yimanangan ngangk thay-thayanathinweya. Ngampiya pam wanch il-ilantan ngangk minangam thaa'-kuump-kuumpāmp thanangweya puth than min iyy-iiyantana ngampar.

¹⁹ Than pam wanch Christians aak Asia.angan wun-wuntana, thanan thawin ngathar ngay wik inan waa'āng niyantana weya thanan niyang ngaantam-ngeey-ngeeyantana. A' than Priscilla-a, puth Aquila-a, a' putha than Christians wiy anangan than aak thanntamangan karpam yalmathwuntana-a, thanwey thawin than kaangk paththam wun-wuntana niyantana, puth than ngaantam-ngeey-ngeeyantana niyang thampa.

²⁰ Than ngurp ngamparam yotana inangan thaw-thawina, ngay niyantana waa'āng thanang niyangan ngaantam-ngeey-ngeeyantana, a' niy puth Christians nanangan yal-yalmathwuniyan-a, niy ompam kath-kathwun a' walmant piint-piintwuna. ²¹ A' ma' ngatharanga ngay wik inangan umpang niyantana: ngay thamp kaangk paththam wun-wunang niyantana.

²² Nil wee'ana God.antaman kaangk ke'an-a, nil God.angan way paththam waa'owan a' aak wayak ngul kuchowan. Ayyang! Moom ngantamang, pal oth-oth wampāna!

²³ Ngay kaangk nil Lord.ana ngangk minangam anman iyy-iiyow niyantana, ²⁴ a' ngay kaangk paththam wun-

wunang niyantana, ngampan puth ke' thonam yimanan-
gan iiy-iiyanamp Jesus.antanga ngula.

In Paul.antam,
Anman kan.

Wik Inangan Kan-Kanam God.antama
The New Testament in the Wik-Mungkan language of Cape York,
Australia

copyright © 1984 Wycliffe Bible Translators

Language: Wik-Mungkan

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-05-14

PDF generated using Haiola and XeLaTeX on 14 Jun 2022 from source files dated 28 May 2022

034de520-6788-5805-9b17-b658084b38e2